

**TUSI AOGA ASO SA 2019**  
**VASEGA FEOLOOLO**

**MANATU AOAQ:**            **IESU E, A’OA’O I MATOU IA**  
   **POPOTO I OU ALA**

**IANUARI & FEPUARI:    A’OA’O MA SAVALI AI**

27            E manuia le tamaitiiti usita’i  
   **(ASO SA TUPULAGA)**    Efeso 6: 1 – 4

**FEPUARI:**

3            Savali ma pipii i le Alii  
   Teuterenome 11: 22 – 25

10           Faalogo ma a’oa’o i mea lelei  
   Salamo 34: 11 – 14

17           Talitonu i le a’oa’o mai o Iesu  
   Ioane 3: 1 – 7

24           Molimau iā Iesu Toetu  
   Galuega 5: 27 – 32

**MATI:                            IA OLA I FA’AA’OA’OGA LELEI**

3            A lelei matua e manuia fanau i le lumanai  
   Numera 14: 20 – 25

10           Onosai i faigata            Roma 12: 9 – 13

17           O le faamaualuga e faamaualoina  
   Luka 14: 7 – 11

24           Fiafia e sailiili i le Tusi Paia  
   Galuega 17: 10-15

31           Talitonu ina ua vaai tino  
   1 Tupu 10: 1 - 9

**APERILA:    IA ILOA MEA E TAUA**

7            E pule le Alii i mea uma  
   Salamo 24: 1 – 2

14           Ia fa’aaloalo iā Iesu  
   **(Aso Sa Laupama)**    Mataio 21: 1-11

21           Na maliu Iesu, ae na Toetu  
   **(Aso Sa Toetu)**        Ioane 20: 1 – 18

28           E lē tutusa le Atua ma se tupua  
   Teuterenome 4: 15-20

**ME:                            FILIFILI IA SUI**

5            Su’esu’e muamua oe    1 Korinito 11: 27 – 32

12           O le fafine mativa loto foai  
   **(Aso Sa Tinā)**        Mareko 12: 41 – 44

26           Liliu i le Alii e sa’oloto ai  
   Galuega 3: 17 – 21

**IUNI:                            O LE A LE UIGA O LE OLA AUAUNA?**

2            Galue i le faasinoga a Iesu  
   Ioane 13: 12 – 16

9            Auauna ma faamoemoe i le Atua  
   Kenese 31: 36 – 44

16           Auauna ma le fiafia  
   Efeso 6: 5 – 9

23           Na o le Atua Soifua e auauna i ai  
   1 Tupu 22: 51 – 53

30           Auauna i le Atua ae le o le oa  
   Luka 16: 10 – 13

**IULAI: E TOFOTOFO OE E LE OLAGA**

- 7 Ua fefefe le nuu i mea ua tutupu  
Esoto 20: 18-21
- 14 Faaeteete i agaga leaga  
1 Ioane 4: 1 – 6
- 21 Ua faamanuia le Atua iā Aperaamo  
Kenese 22: 15 – 19
- 28 E tofotofoina o tatou loto  
1 Tesalonia 2: 1-4

**AOKUSO: E TE MANA’O I LE A MAI LE ALII?**

- 4 Ua manana’o Isaraelu i so latou tupu  
1 Samuelu 8: 1-9
- 11 O le tamā loto faamagalo  
(**Aso Sa Tamā**) Luka 15: 11 – 24
- 18 Ua tali le Atua ia Palaamo  
Numeru 22: 2 – 14
- 25 Ua faamama e Iesu le lepela  
Mataio 8: 1 – 4

**SETEMA & OKETOPA:**

**E LĒ MAFAI ONA E FAIA NA O OE**

- 1 Ia fai nuu uma ma so’o  
(**Aso Sa Tala Lelei**) Mataio 28: 16 – 20
- 8 Ua lē lavā Mose Numeru 11: 10 – 15
- 15 Galulue faatasi e tino mai ai se faamoemoe  
Neemia 4: 1 – 6

- 22 Tumau i le Alii e manuia ai  
Ioane 15: 1 – 11
- 29 Saili fesoasoani pe a mafatia  
Esoto 18: 17-23

**OKETOPA:**

- 6 Tapenaga o le Lotu Tamaiti  
13 **Aso Sa Tamaiti**  
20 Malologa Lotu Tamaiti  
27 Ua toe aami Iefata e le nuu  
Faamasino 11: 1 – 11

**NOVEMA: ‘AUA E TE SEE ESE MAI LE ALA**

- 3 Tumau lo outou faamaoni  
1 Korinito 15: 5 - 8
- 10 Faalagolago i le Alii i soo se taimi  
2 Nofoaiga Tupu 14: 9 – 15
- 17 Ia tausisi i le alofa  
1 Ioane 4: 7 - 12
- 24 E sili lava ala o le Alii  
Isaia 55: 6 – 9

**TESEMA: O IESU LE FAAOLA**

- 1 Ua fanau mai Iesu le Tupu  
Mataio 2: 1 – 6
- 8 Na afio mai Iesu e Faaola le lalolagi  
Ioane 3: 16 - 18
- 15 O le Tala Lelei mo i tatou uma  
Luka 2: 8 - 14

**MANATU TAIALA IANUARI & FEPUARI:  
“A’OA’O MA SAVALI AI”**

E taua le a’oa’oina o o tatou tagata i a’oa’oga lelei mo le ola ma le lumanai. E tatau ona tatou popoto, tatou te malamalama ai i mea o le olaga. Peita’i e sili lava ona taua, lo tatou savavali ai i a’oa’oga ma faasinoga ua a’oa’oina ai tatou. E matagofie lava le faatino o nei a’oa’oga aogā auā e viia ai le Alii.

**ASO SA: 27 IANUARI 2019**

**MATAUPU: E MANUIA LE TAMAITITI USITA’I**

**SINI:** Ia malamalama le vasega o le ola usiusita’i e faia mea lelei, e faamanuiaina lea e le Atua.

**TUSI FAITAU:** Efeso 6: 1 – 4

**FESOASOANI MO FAIAOGA:**

Talofa tamaiti! O a mai outou? Sa outou fiafia i le tuuga ma malologa? Ae a le Kirisimasi ma le tausaga fou? O a au mea na fai (taitoatasi) poo polokalame a le tou Aoga Aso Sa na fai ai? Lelei tele. Talitonu sa maua fiafia e outou ia taimi o tafaoga ma malologa, e le gata i aoga a le malo, ae faapea foi le tatou aoga Aso Sa. O lenei foi ua toe a’e le tatou Aoga Aso Sa o lenei tausaga fou, 2019. Tatou patipati faatasi e faailoa ai lo tatou faafetai i le Alii.

O le tatou mataupu amata la o lenei tausaga – “E MANUIA LE TAMAITITI USITA’I.” O ai e usita’i i ona matua? Lelei o se amioga lelei lea e tatau ona maua ia i tatou uma. E tatau ona tatou usiusita’i i o tatou matua i taimi uma, auā o matua ua

a’oa’oina i amioga ma upu lelei a le Alii, ma ua latou fiafia foi e a’oa’o ai a latou fanau. I le a’oa’oga a Paulo ua faailoa atu i le au Kerisiano i Efeso, o se faasinoga tatau lea mai le Alii mo e ua faatuatua ia te Ia. O le a’oa’oga e amata mai totonu o le aiga. O fanau e ao ina faalogo ma ava i matua, aua o le faailoga lava lea o lo latou alolofa ia i laua ma le Atua. O se amioga e ao ina tatou faia i so o se taimi o lo tatou ola, auā o o tatou matua o lo o tausia, fafaga, faa-a’oga ma puipui lo tatou ola.

Tamaiti, afai e moni ua e talitonu ma faatuatua ia Iesu, e tatau ona faamaonia lea i lou aiga i fesootaiga ma i latou ua sili ona iloa ma malamalama ia i tatou. Ma e leai se isi ua sili ona iloa oe, e pei o ou matua, uso, tuagane ma tuafafine. E faamanuia o tatou matua ia i tatou, pe a tatou usiusita’i ma faalogo ia i laua. O le galuega faa-matua i le tausiga o fanau e le vaai i se itu e tasi, ae o le galuega e lē gata i le tino (lavalava, maloloina) ae aofoi i le mafaufau (amioga, tautala, savali). E oo foi i le ola faa-le-Agaga, e naunau matua ia iloa e fanau le Atua, Iesu ma a’oa’oga a le Tusi Paia. E tatau foi i matua ona taofi le faaonono i fanau auā e tupu ai le ita ia i latou, ma lē a’oa’oina ai o latou mafaufau.

**Uiga o Upu:**

i) faaonono - faaita/faatiga

**GALUEGA FAATINO: Paso.**

Saili mai upu o i lalo, i totonu o le paso

ALII	OUTOU	LAUELEELE	TONU
AVA	FANAU	MATUA	TAMĀ
AOAIGA	FAALOGO	MANUIA	TINĀ
APOAPOAIGA	NOFO	TULUI	TAUSI
FAAONOONO			

A	O	A	I	G	A	V	A	E	F
P	L	E	O	I	M	A	T	U	A
O	A	I	P	S	A	S	I	N	A
A	U	U	I	T	T	N	N	O	O
P	E	L	U	I	S	U	A	I	N
O	L	U	A	L	U	O	T	U	O
A	E	T	N	T	F	M	O	H	E
I	E	P	A	V	I	V	F	K	N
G	L	S	F	A	A	L	O	G	O
A	E	M	N	A	I	U	N	A	M

**PESE:** A’oa’o le pese lea

- O oe le teine ma le tama  
Faalogo i matua  
Auā e manuia ai lou olaga  
Usitai ia papa  
Fesoasoani ia mama  
Tuu le pepelo ma le augata

Tali: Talitonu i le Alii o Iesu  
O ia e faamanuia mai  
Alofa ia i tatou

(fati pese – A tumau ia Iesu)

**A’OA’OGA:**

- Usita’i i matua
- Faalogo ma talia fautuaga mai matua
- Ia e ava i so o se tagata.

.....

**ASO SA: 3 FEPUARI 2019**

**MATAUPU: SAVALI MA PIPII I LE ALII**

**SINI:** Ia malamalama le vasega, so o se tagata e savali i ala tonu o le Atua ma tumau ai i taimi uma, e faamanuia i ai le Alii.

**TUSI FAITAU:** Teuterenome 11: 22 – 25

**FESOASOANI MO FAIAOGA:**

O le tatou mataupu o lenei Aso Sa – SAVALI MA PIPII I LE ALII, o apoapoaiga poo fautuaga ia a Mose le auauna a le Atua. Ua ia ta’u atu ia Isaraelu uma le finagalo o le Atua, ina ia faia auā e faamanuiaina ai latou e le Atua.

O tulafono ma poloaiga uma nei a le Atua, e moomia le faia e tagata uma i aso uma o le ola. Ia tausisi i ai i so o se taimi, auā o le faailoga lava lena o lo latou alolofa moni i le Alii lo latou Atua e toatasi. E ao ina savavali i ala tonu uma ua faasino mai i tulafono (Esoto 20: 3 – 17), ma pipii atu ia te Ia. O lona uiga, e le na o le tauloto o tulafono ma poloaiga i aso uma. E finagalo le Atua, ia iloa ma faatino mea lelei i o latou olaga i so o se taimi. Ia mausali i o latou loto, pe afai latou te faamaoni e tausi i ai, o le moni foi lena o lo latou tutumau i lo latou Atua.

Pe afai e usiusitai ma faamaoni Isaraelu e savavali i ala o le Alii ma faatuatua i le Atua, o le a faapea foi ona fesoasoani lo latou Atua i so o se taumafaiga ma so o se manaoga o latou moomoo i ai. E mafai e le Atua ona tulia nuu uma oi o latou luma, ma fai mo i latou nuu e toatele ma malolosi i lo latou. O laueleele foi ma fanua e solia e o latou vae i le malaga i Kanana, e aveva lava ia fanua e fai ma tuaoi ma nuu ese. Ma ua folafola foi e le Atua,

e lē mafai foi ona tu mai se tagata, e tete'e ia i latou. E tuuina atu e le Alii le mata'u ma le fefe i ia tagata ese, ona o Isaraelu lona nuu.

Tamaiti, e ese le manaia o le tagata e savali ma tumau pea lona ola i le Atua. E lē gata ina tupu ai le fiafia, ae lē popole i so o se faigata ma puapuaga. O le Atua e alofa i le tagata e usita'i i ona ala ma pipii atu pea ia te Ia i taimi uma. Ua tatou tauloto i tulafono a le Alii. Ae sili i lona finagalo lo tatou savavali ma faatino i le ola o aso uma. O lo tatou alolofa i le Alii, o lo tatou faia lea o lona finagalo ua faasino mai tatou te ola ai. Sa faapena foi lo tatou Alii o Iesu, na savali ma pipii pea i lona Tamā ao a'oa'o i tagata. E maliu lava o Ia, o tumau pea lea faamaoni ia te Ia. O lona maliu ma lona toetu manumalo, o le manumalo foi lea e oo ia i tatou, pe a tatou lafoai le agasala, ae ia tatou savavali ma pipii ia te Ia ma le faatuatua.

**GALUEGA FAATINO** (faatumu avanoa)

Filifili le upu sao mai le lisi o i lalo, e faatumu ai avanoa i le parakalafa (fefe, alofa, poloaiga, mata'u, savavali, tetee)

E tatau ona tatou faia \_\_\_\_\_ uma mai le Atua. O lo tatou fiafia e \_\_\_\_\_ i tulafono ma sauniga a le Alii, o le moni lena o lo tatou \_\_\_\_\_ ia te Ia. O Ia lava e \_\_\_\_\_ atu i o tatou fili, ma faatupu le \_\_\_\_\_ ma le \_\_\_\_\_ ia i latou.

**PESE:** When we walk with the Lord  
  
When we walk with the Lord  
In the light of His word  
What a glory, He sheds on our way  
While we do His good will  
He abides with us still

And with all who will trust and obey

Ch: Trust and obey  
For there's no other way  
To be happy in Jesus  
But to trust and obey.

**A'OA'OGA:**

1. Savali i ala o le Alii
2. Pipii i le Atua e ola ai
3. Usita'i i faatonuga a matua.

.....

**ASO SA: 10 FEPUARI 2019**

**MATAUPU: FAALOGO MA A'OA'O I MEA LELEI**

**SINI:** Ia malamalama le vasega, e taua i so o se tagata ona faatino a'oa'oga lelei ua faalogo i ai.

**TUSI FAITAU:** Salamo 34:11- 14

**FESOASOANI MO FAIAOGA:**

Tamaiti, o le tatou mataupu o lenei Aso Sa, ua faatonu mai ai Tavita ia i tatou, ina ia tatou faalogo i mea lelei e tele mai lo tatou Atua ma a'oa'o i ai, tatou te manuia ai. E manao lo tatou Atua, ina ia tatou ola matata'u ia te Ia i taimi uma. Afai tatou te mananao ia tatou ola fiafia i lenei lalolagi, e ao ia i tatou ona tatou a'oa'o ma tautatala i mea lelei ae lē o le gagana i mea leaga.

Tamaiti, ua i ai isi o i tatou ua malolosi o latou laulaufaiva e tautatala i mea valea ma upu leaga. Ua fai ma mea suamalie i o latou laugutu ona ta'uta'u i upu inosia i le faalogo a matua, o isi tagata aemaise le Atua. Ua faailoa e Tavita, e lē fiafia le Atua i lo tatou fiafia i ia mea leaga, e a'oa'o faatasi ma mea lelei, auā o lo tatou faaoleole lava lea i le Atua. O lo tatou ola matata'u i le Atua, o lo tatou migao lea ia te Ia. E lē o le filemu pe a alu i le lotu, ae o loo fiafia pea e a'oa'o i gagana leaga.

Tamaiti, e moomia lo tatou 'alo ese ma faagalo i ia vaega leaga o lo tatou ola. Afai tatou te fia mafuta ma lo tatou Alii i lenei ola, e ao ina ola migao i ona luma i so o se taimi. Poo a foi taimi tatou te feagai ai ma faigata ma puapuaga o lenei ola, na o lo tatou Atua lava lo tatou fesoasoani ma le lavea'i. E auala mai i nisi tagata le alofa o lo tatou Atua, e faasao ai ma lavea'i tatou pe a mafatia i tiga o le ola. O lo tatou sailiili i se olaga e to'amalie ma filemu, tatou te maua lava, pe afai e tausisi pea i mea lelei ma a'oa'o i ai, auā o faasinoga lava mai le Atua.

Tamaiti, ia tatou fa'aaloalo ma ola migao i matua ma isi tagata, ae sili lava lo tatou Atua. E fiafia le tatou uo o Iesu, pe a tatou a'oa'o i mea lelei i so o se taimi.

#### **GALUEGA FAATINO:** (Tusitusiga –Sailiiliga)

Faatonuga: Tali mai i fesili e lua ua tuuina atu. Aumai ni au faataitaiga e lima i le fesili e tasi.

1. O a ni mea leaga e tatau ona tatou 'alo ese ai i lo tatou fesootaiga ma isi tagata?
2. O a ni mea lelei e tatau ona tatou fiafia e fai ua finagalo ai le Alii i lo tatou ola?

**PESE:** Faalogo ma usita'i

#### **A'OA'OGA:**

1. Ia 'alo ese i amio leaga
2. Ia amio lelei ma fa'aaloalo
3. E fesoasoani le Alii ia i tatou.

.....

**ASO SA: 17 FEPUARI 2019**

**MATAUPU: TALITONU I LE A'OA'O MAI O IESU**

**SINI:** Ia malamalama le vasega, o mea uma ua a'oa'o mai ai Iesu ia i tatou i le Tusi Paia, e tatau ona talitonu i ai auā o a'oa'oga moni e manuia ai.

**TUSI FAITAU:** Ioane 3: 1 – 7

#### **FESOASOANI MO FAIAOGA:**

Tamaiti, e ese le tele o mea taua ua a'oa'o mai ai lo tatou Alii o Iesu, pei ona i ai i le Tusi Paia. Ma e moomia lava lo tatou taliaina ma talitonu i ai, auā o le finagalo lea o le Alii ia i tatou. E le gata ina fiafia ai tagata ia i tatou, ae o uiga faa-Iesu ia, tatou te maua ai lona malo i le manuia e faavavau.

O le pogai foi lena na alu ane ai Nikotemo ia Iesu i le po. Sa naunau lava o ia ina ia a'oa'o ina o ia e Iesu i mataupu faa-le-Agaga ua lē mafai e lo latou talitonuga faa-faresaio ona tali i ai. O le au Faresaio ma le au Satukaio, o vaega taua ia i le lotu Iutaia. O nei vaega po o nei faalapotopotoga, e tausisi ma faataua e latou tu ma aganuu faa-Iutaia. Latou te manatu ua na o

tusi e lima a Mose (Kenese-Teuterenome) le Tusi Paia, ua i ai tulafono mo le ola o tagata. O nei foi tagata, latou te tetee ia Iesu ma ana a’oa’oga, auā e tele ina faasa’o e Iesu la latou pule sēsē o faia i tagata, ma Ia luitauina a latou a’oa’oga.

O Nikotemo, o ia o se faiaoga faresaio i le lotu a Iutaia. Ua talitonu o ia iā Iesu, auā na ia iloa faailoga e tele na faia e le Alii i mea na a’oa’o ai i tagata. O iina na ia molimauina ai, e moni lava o Iesu le a’oa’o ua maliu mai le Atua. E ui o ia o le faiaoga ma le faipule ia Iutaia, ae ua alu lava ma lona loto gaogao se i a’oa’oina ma faatumu e Iesu i mea moni e uiga i le Atua ma lona malo. Ua fetalai atu Iesu ia te ia – “E moni, e moni, ou te fai atu ia te oe, a le toe fanau le tagata, e lē mafai ona iloa e ia o le malo o le Atua.” Na manatu Nikotemo, o le toe fanau mai o le tagata i lona tina na fanau mai ai, lea ua tautala i ai Iesu. Peitai ua a’oa’o mai Iesu i le fanaufouina faa-le-Agaga o le olaga o le tagata. Ia lafoai e le tagata le agasala ma liliu atu e ola i amioga faa-Iesu. Ia faamamaina le ola i le vai (faaletino) ma le Agaga (faale-Agga) o le Alii. Ia aveese le olaga leaga ma le agasala, ae ia talia le malo o le Atua, e ala i le galue atu o le Agaga Paia. Ia salamō ma faafou le ola.

O le malo o le Atua ua faatatauina ia i latou ua liliu atu le olaga tuai ia Keriso. Ua talitonu ma taitai Keriso i lona olaga. O ē ua atoatoa le ola i le Alii i taimi uma. O lo latou ola i lea olaga fou ia Keriso, latou te maua ai le ola faavavau.

Tamaiti, na fiafia ma ofo Nikotemo i le a’oa’o atu o Iesu ia te ia, auā ua saga tupu ai lona faatuatua ia Iesu, auā ua manino ma malamalama o ia i mea e tele na faanefu ua fa’aalia manino e le Alii. Le fanau e, talitonu nei i a’oa’oga a Iesu, ma ia tatou ola uma i lona malo, ona tatou maua lea o le fiafia ma alofaina i tatou e le Atua.

**Uiga o Upu:**

- i) Faresaio - taitai o le lotu Iutaia
- tete’e ia Iesu ma ana a’oa’oga
- ii) rapi - faiaoga o le tulafono ma le lotu Iutaia

**GALUEGA FAATINO:** Faatinoga

E lelei tele ae faatino e nisi o le vasega le tala, i le talanoaga a Iesu ma Nikotemo. E mafai ona faitau mai pea i le Tusi Paia saunoaga a Iesu i fesili a Nikotemo. (E taua foi ona faasolo i ai tamaiti pe a lava se taimi)

**PESE:** Pese masani – Faalogo ma usita’i

**A’OA’OGA:**

- 1. Faalogo lelei ma maitau
- 2. O Iesu le faiaoga sili
- 3. Faataitai i a’oa’oga lelei i aso uma.

.....

**ASO SA:** 24 FEPUARI 2019

**MATAUPU:** MOLIMAU IA IESU TOETU

**SINI:** Ia malamalama le vasega, o se mea taua tele le ta’uta’u atu i isi, o Iesu na maliu ae ua toetu mai, ma o loo soifua foi ma mau ma i tatou.

**TUSI FAITAU:** Galuega 5: 27 – 32

**FESOASOANI MO FAIAOGA:**

Ua iloa e tagata na tetee i le talaiga o le Tala Lelei, o loo i le malumalu le au-Aposetolo, o a'oa'o atu i le nuu, ona latou taitai mai lea o i latou i luma o le fono a taitai o le lotu Iutaia. Ua fesiligia e i latou le au Aposetolo, "Pe na matou lē matuā fai atu ea ia te outou, ia soia le toe a'oa'o i lena igoa (Iesu)? E foliga mai ua vavao soo e taitai o le lotu Iutaia ia lē toe molimau atu ia Iesu Toetu. E ui i lea, ae ua lē solomuli lava ma faavaivai ai i latou. O lo latou faamoemoe lava, ia salalau atu ma toatele tagata e talia le Tala Lelei ia Iesu Toetu. O le uiga ma le faamamafa lea o lo latou valaauina e fai ma Aposetolo - o e ua auina atu, e fai ma ave feau, e molimau atu ma tala'i le faaolataga mo tagata uma, na ala mai i le maliu ma le toetu o Keriso.

O le manatu lea ua faailoa atu e Peteru ma le au-Aposetolo i taitai ma e ua tetee mai i le talaiga. E tatau i tagata uma ona 'ana'ana (usitai) e fai le finagalo o le Atua, na i lo le usitai e faamamalu tu ma aga masani, auā e lē gata ina maua ai le nonofo lelei, ae maua ai le faamagaloina o agasala. Ua faamanatu atu e Peteru ma le au Aposetolo, o Iesu na latou fasiotia ma faasatauroina, o Ia lava o le Alo o le Atua. Na ia toe faatu ia te Ia, ma aveina ae i le lagi i lona aao taumatau. O Ia o le Faaola na te laveai ma faaola i le tagata ua salamō i agasala.

E ui ina inosia le galuega molimau a le au Aposetolo e tagata, ae na faia lava ma le faatuatua i le Alii, auā o lo latou inoino ia i latou, o le inoino lava lea i le Atua (Ioane 15: 18). E lē gata i lena, ae o Iesu lava na fetalai ia i latou "*Amuia outou pe a itagia outou e tagata, pe a faateaseina foi outou, ma faaleagaina e i latou, ma lafoa'iina lo outou igoa, pei se mea leaga ona o le atalii o le tagata* (Luka 6: 22)

Tamaiti, o lo tatou fiafia i le Aoga Aso Sa, le lotu ma toaga e faitau le Tusi Paia, o lo tatou malamalama foi lena i le tala ia Iesu Keriso. O iina foi e te fiafia ai e ta'uta'u, molimau atu i isi

tamaiti, ae sili lo tatou ola ai i a'oa'oga taua ua a'oa'o mai ai le Alii i lo tatou ola.

### **GALUEGA FAATINO:** Tusitusiga

Tusi mai ni au fuaiupu se lima, e te molimau ai i la tatou uo o Iesu.

- PESE:**
1. O Iesu lo'u Alii, faamagalo a'u agasala x 2  
O Iesu lo'u Alii x 2  
O Iesu lo'u Alii, faamagalo a'u agasala
  2. O Satani le fili, e leaga ai lo'u olaga x 2  
O Satani le fili x 2  
O Satani le fili, e leaga ai lo'u olaga
  3. Talai atu Iesu, le faaolataga x 2  
Talai atu Iesu x 2  
Talai atu Iesu, le faaolataga

(fati – Jesus is the rock – O Iesu le papa)

### **A'OA'OGA:**

1. Fiafia e ta'uta'u atu le suafa o Iesu i au uo.
2. 'Aua e te ma e tautala ma pese i le suafa o Iesu.
3. E faamagaloina i tatou e Iesu.

.....



**MANATU AUTU MATI: IA OLA I FA'AA'O'A'OGA  
LELEI**

O lo tatou ola i fa'aa'o'a'oga lelei ma faasinoga tataua ua aumai e o tatou matua i le taimi lenei, O le a le pine ona faamanuiaina ai tatou i le lumanai. O le Atua e faamanuia i le tagata e ola usiusita'i i ta'ita'iga lelei mai ia te Ia.

**ASO SA: 3 MATI 2019**

**MATAUPU: A LELEI MATUA E MANUIA  
FANAU I LE LUMANAI**

**SINI:** Ia malamalama le vasega o galuega lelei ma le tautua faamaoni a matua, e manuia ai le fanau i le lumana'i.

**TUSI FAITAU:** Numera 14: 20 – 25

**FESOASOANI MO FAIAOGA:**

Tamaiti, o le tatou mataupu o lenei Aso Sa, e mafai ona a'oa'oina ai tatou le fanau, i le faamoemoe o o tatou matua mo i tatou le fanau i le lumanai. E manatu i latou, afai e mavae atu i latou i lenei ola, ae ia maua e fanau le ola solo lelei ma le manuia. O le pogai lena e tauivi ai ma faamalolosi matua i galuega lelei, o fautuaga aoga ma lapataiga e tele mo i tatou le fanau, ina ia faamanuiaina fanau e le Atua i taimi o i luma.

E lē taumateina i la tatou faitau i le Tusi Paia, le vaai mamao ma le fuafua lelei o Kalepo le atalii o Iefune, ao agai atu Isaraelu i Kanana lo latou tofi mai le Atua. Sa tauivi ma mulimuli moni i le Alii e ala i le faamaoni e fai le finagalo o le Atua, e pei ona faatonuina ai i latou e Mose le taitai. O le manatu o Kalepo, pe

afai e mavae atu o ia ma lona toalua, o ona uso, tuafafine, ma i latou uma le au matutua o lo latou aiga, ae ua mautu ma faamanuia mai le Atua i a latou fanau i ni fanua e nonofo ma fai ai mo latou tofi i le lumanai.

E toatele tagata o le nuu na iloa le mamalu ma le silisili ese, o faailoga na faia e le Atua i Aikupito ma le vao o savavali ai. Ma ua latou lē fia faalogo i le leo o le Atua. Sa latou tofotofa faasefulu i le Alii, e fia suesue i le malosi ma le mamalu o le Atua. E ui lava i lo latou lē usiusita'i i le Atua, ae na faamagalo lava o Ia ia i latou ma faailoa atu ia i latou, latou te le oo lava i le nuu na Ia tauto ai i o latou tamā, latou te lē vaai foi i ai.

E le i aafia Kalepo i ia tagata fouvale i le Atua, auā e ui i tiga ma faigata o le malaga, ae na tutumau lava o ia i le Atua ua ia faatuatua i ai. Ua talitonu o ia o le Alofa o le Atua e tumau i totonu o le tagata ua alofa moni ia te Ia (1 Ioane 4: 16). Ma e faamanuia foi le Atua ia te ia. Ua faailoa atu e Mose ia Kalepo, e faaooina lava o ia e le Atua i le nuu na ia alu muamua i ai, ao avea ai o ia o se tasi o le toasefulu-lua na asiase faalilolilo i Kanana. Ae sili i ia mea uma, faamanuiaga i fanua ma laueleele o le a maua e lana fanau ma le ituaiga uma o Iuta. E ui e le o ta'ua ia faamanuiaga mo le fanau a Kalepo, ae na latou maua lava i le faasoaina o fanau.

Tamaiti, e a'oa'o pea tatou mai lenei tala, auā o aiga lelei, mautu ma faamanuiaina ua tatou nonofo ai, o taumafaiga a nai o tatou tuua, o e ua maliliu, aemaise foi o o tatou matua o ola pea. Ma e manuia so o se mea, auā na usiusita'i, faamaoni ma ola i le amiotonu a le Atua. O se faasinoga lelei foi lea mo i tatou uma mo le vaavaai atu i le lumanai.

**Uiga o Faaupuga:**

“...tofotofa faasefulu ....”

O tofotofoga e sefulu na toilalo ai Isaraelu, ao iai i le ala agai atu i le nuu folafolaina.

1. Esoto 14:11-12 - leai se faatuatua e sopoia ai le sami ulaula
2. Esoto 15: 24 - muimui i le vai oona i Mara
3. Esoto 16: 3 - muimuiga i le vao o Sina
4. Esoto 16: 20 - faaputu le manai, sili atu ma le aso e tasi
5. Esoto 16: 27-29- faaputu le manai i le sapatu
6. Esoto 17:2-3 - muimui i le lē maua o se vai i Refiti
7. Esoto 32:7-10 - tosina atu i le ifo i tupua i le tamai povi auro
8. Numera 11:1-12 - muimuiga i Tapara
9. Numera 11: 4 - Tupu pea le muimui i le faaletonu o meaai
10. Numera 14:1-4- leai se faatuatua o le Atua, ao sauni ulufale i le nuu folafolaina.

**GALUEGA FAATINO:** (Faafetauiga)

Faafetaui upu i le agavale i o latou uiga sao o i le itu taumatau.

- |      |           |   |                   |
|------|-----------|---|-------------------|
| i)   | faamagalo | - | suesue            |
| ii)  | mamalu    | - | ita, fultua mai   |
| iii) | tofotofo  | - | faalelei          |
| iv)  | leo       | - | faataunuu         |
| v)   | inoino    | - | paia, silisiliese |
| vi)  | mulimujli | - | siufofoga         |
| vii) | faaoo     | - | usiustai          |

**PESE:** Faamanatu le pese masani lea

When we all work together, together together'  
'Afai tatou te galulue faatasi, faatasi faatasi'

**A'OA'OGA:**

1. Tumau i le Alii i taimi uma.
2. Ae toaga i le aoga e manuia lou lumanai.
3. Alofa i matua i le taumafaiga o le aiga.

.....

**ASO SA: 10 MATI 2019**

**MATAUPU: IA AMIO FAAKERISIANO**

**SINI:** Ia malamalama le vasega, e finagalo le Alii ia faataitai a tatou amio ia Iesu Keriso.

**TUSI FAITAU:** Roma 12: 9 – 13

**FESOASOANI MO FAIAOGA:**

Tamaiti, e ese le taua o a'oa'oga ua aumai e le tatou mataupu o lenei Aso Sa. O nisi ia o apoapoaiga a le Aposetolo o Paulo ua tuuina atu i le au Kerisiano i Roma. O amioga tataua e ao ina ola ai tagata uma, e iloa ai o i latou o tagata ua talitonu moni ia Iesu. O le ta'ua o le tagata o le Kerisiano, o lona uiga o lē ua ola ma mulimuli i a'oa'oga a Iesu.

O le faatagā alofa i le isi tagata, o lou talanoa lea i ai faapei o loo e fiafia i lea tagata, ae peita'i ua tumu oe i le inoino ma le ita i ai, ona o sana mea leaga na fai. Ua valaauina ai tatou le fanau e le Alii ina ia faamaoni ma atoatoa lo tatou alolofa atu i isi tagata ma fa'aaloalo i ai. O le alofa moni e moomia le atoatoa i ai o lou loto, ma ia e galue foi i ai i lea tagata vaivai. O lou fesoasoani i lea tagata e avea ai foi ma tagata lelei. E moomia

sou taimi e te faasoa atu ai i lou tuaoi na o oulua. E i ai tagata o loo moomia lou alofa moni i mea o popole ma mafatia ai. Faasoa foi i isi Kerisiano mo se fesoasoani i lē o vaivai. Faailoa i ai, e inoino le Alii i amioga leaga tatou te fai, auā e viia lo tatou ola pe a tumau pea tatou i le lelei.

E tatau foi ona agalelei i isi tagata ma ava i ai, auā o i latou na faia e le Atua i lona faatusa faapei foi o oe. E ta'ua i latou o o tatou uso ma tuafafine ia Keriso, auā o lo o i ai foi lo latou aogā i le Ekalesia a Keriso. O lou agalelei ma lou ava i isi Kerisiano e liliuina ai o latou loto faavaivai i le filiga ma le faamalosi e auauna i le Alii. O lo tatou tausi i amioga faa-Kerisiano, e tupu ai le fealofani i lo tatou va ma isi Kerisiano, auā poo a tigā ma puapuaga e oo mai ia i tatou, tatou te maua pea le onosai ma le olioli, auā ua ia Keriso lo tatou faamoemoe moni. E tatau ona tatou faamalolosi i le tatou tatalo e le aunoa i lo tatou Alii. E le gata la ina tatou fiafia i le tatalo, ae ia faatinoina foi lo tatou alolofa i isi Kerisiano, e ala i le faasoa atu ma tufatufa atu ni mea ua tatou maua i ē ua matitiva ma lē tagolima.

Le fanau e, e manaia foi ae tatou faata'ita'i i nisi o amioga faa-Kerisiano ua a'oa'oina ai tatou i lenei mataupu. O le agaga o la tatou mataupu, o lo tatou amio ai lea i aga faa-Kerisiano i aso uma.

### Uiga o Upu:

- i) fefaapalepalea'i - feagaleleia'i, fetausia'i
- ii) tausolomua - faamaite, muamua
- iii) finafinau - faamalolosi, tauivi

### GALUEGA FAATINO: Saililiga

Tusi mai ni amioga se sefulu, e tatau ona faia e le Kerisiano

ft - loto fesoasoani

**PESE:** Saili le faiaoga i se pese mo le mataupu.

### A'OA'OGA:

1. Alofa i so o se tagata.
2. Faamafanafana i le uso mafatia.
3. E fiafia Iesu i le tagata mativa.

.....

**ASO SA: 17 MATI 2019**

**MATAUPU: O LE FAAMAUALUGA E FAAMAUALALOINA**

**SINI:** Ia malamalama le vasega, ua faasino mai e Iesu ia i tatou le ala e saili ai i le mea sili e tusa ma lona finagalo.

**TUSI FAITAU:** Luka 14: 7 – 11

### FESOASOANI MO FAIAOGA:

Tamaiti, o le tala o le tatou mataupu i lenei Aso Sa, o lo o faamatalaina ai e Iesu le tala faataoto, e uiga i le mea sili e tatau ona saili i ai le tagata. O se a'oa'oga e a'oa'o ai tagata uma, aemaise lava i a'oa'o tulafono ma le au faresaio o le lotu Iutaia. O le finagalo o le Alii, e le tatau ona naunau atu le tagata i le fia maua o le nofoaga, po o le tulaga sili i lona va ma le isi tagata i

lenei ola. E lē tatau ona ola faatusatusa ma faatautavā le olaga i le isi uso.

Ua aumai ai e Iesu le faaitaiga faigofie, e faamalamalama ai lona finagalo, e ala i le auai atu o le tagata ua valaauina, i le taumafataga o se faaipoipoga. Afai e auai atu i ai, 'aia le naunau e taoto pe nofo i nofoaga sili ma mauuluga, auā atonu lava e iai nisi ua valaaulia e sili ia te oe. Nei alu atu se auauna ma fai atu ia te oe, e fa'aavanoa le nofoaga o e nofo ai mo lē ua sau e sili ia te oe, ona e mā ai lea ma alu i le mea e aupito faatauva.

Peitai, pe afai e valaauina oe i lea taumafataga, e ao ina e alu ma nofo i le nofoaga aupito faatauva. Auā pe a sau le auauna, ona valaauina lea o oe ina ia e alu i le nofoaga sili. ona mamalu ai lea o oe ma aai faatasi ai ma ē mauuluga i le taumafataga.

Ua fautua mai Iesu i lenei faataoto, ina ia 'aia le naunau atu tagata mo le fia maua o nofoaga sili ma tulaga mauuluga. O fea lava ua finagalo le Atua e te galue ma auauna ai, o Ia lava o le ana toe valaaulia oe i se tulaga mauuluga. E taua atu i le Atua, i lona malo le auaunaga a le tagata, na i lo le tulaga. E lē faailoga tagata le Atua i lona malo, ae tatala le faitotoa mo tagata uma o e ua saili ma le faatuatua i ai.

Tamaiti o tagata ua faamaualaloina moni, e le o foliga e tosina mai ai isi tagata. Peitai o le olaga ia faatatau i le soifua o Keriso. E le gata i lea, ae ia iloa foi ma le mautinoa, o oe o le tagata agasala ua e iloa le mea e gata mai ai amioga le tatau i le ola. Ia malamalama i meaalofo ma le malosi mai le Alii, ma ia naunau e fa'aaoga ia mea i le ola, e ala i le ta'ita'iga a Keriso. Manatua tamaiti, o le loto mauulalo e le o se mea e faia e le tagata, peitai o se lagona taua i o tatou loto mai le Atua ona o le auaunaga na faia ma le loto atoatoa i ai.

O lo tatou galulue ma le loto mauulalo, e faaeaina lava i tatou e le Atua, auā o lo o moni ma faamoemoe ia Keriso lo tatou ola finau mo se taunuuga lelei. E le tatau ona tatou ola

faamaualuluga. O isi tamaiti ua avea le tele o oloa a o latou aiga ma ala ua faamaualuluga ai i nai isi tamaiti. E tele lava mea ua tupu ai le faamaualuluga o isi tagata i totonu o nuu, aulotu, malo. O le paoa le isi mea ua i le tagata

### GALUEGA FAATINO: Paso

Saili upu nei i totonu o le paso.

Alu, aai, aupito, oulua, fetalai, faataoto, filifili, faaipoipoga, faatauva, faamaualuga, faamaualalo, latou,luma, ma, mea, mamalu, silafia, sili, soso, sau, taitaiina, taoto, taumafataga, valaauina.

A	A	A	I	O	T	O	A	T	A	A	F
U	G	L	E	I	A	L	A	T	E	F	A
P	A	S	U	L	I	A		U	A	A	A
I	A	V	P	I	T	L	F	M	N	A	I
T	V	I	E	S	A	A	I	A	I	M	P
O	U	L	U	A	I	U	L	F	U	A	O
E	A	A	O	U	I	A	I	A	A	U	I
P	T	O	F	O	N	M	F	T	A	A	P
U	A	S	L	T	A	A	I	A	L	L	O
L	A	O	M	A	F	A	L	G	A	U	G
E	F	S	I	L	A	F	I	A	V	G	A
M	E	A	N	A	M	U	L	A	M	A	M

\* E mafai foi ona faamaea e le fanau i aiga, pe afai ua puupuu le taimi.

**PESE:** A'oa'o le pese lea

1. Le Alii sei e faafou mai nei, lo'u olaga,  
Le ola faamaualuga ua tele naua.  
Ua faatauva'a le vaai, fia sili i tagata  
Leai se alofa galo le Atua.

Tali: Lo'u Alii faamagalō mai  
Ia te a'u le tagata vaivai  
'Aua e te lafoai o a'u i ou luma  
Ia faia o se lolo mama, ma faamaualaloina  
Le ola faamaualuga e le aoga.

2. O le loto maualalo e sili lea ia Iesu  
Ola fiafia uma i tatou  
Auauna tatou i le Alii  
Ma ia faia mea silisili  
Lafoai Satani lo tatou fili.

(fati – O le pese “Create in me a clean heart O God”  
‘Le Atua ia faia se loto mama mo au’

### **A’OA’OGA:**

1. ‘Aua e te faamaualuga i lou uso.
2. Ia faapei tatou o Keriso le loto maualalo.
3. Toaga i lau aoga ma manatua Iesu.

.....

**ASO SA: 24 MATI 2019**

**MATAUPU: FIAFIA E SAILIILI I LE TUSI PAIA**

**SINI:** Ia malamalama le vasega, e taua tele ia i latou le toaaga e faitau le Tusi Paia, auā e malamalama ai i le uiga o a’oa’oga o faia i le Aoga Aso Sa.

**TUSI FAITAU:** Galuega 17: 10 – 15

### **FESOASOANI MO FAIAOGA:**

O le fesili tamaiti – O ai e fiafia tele e faitau le Tusi Paia? Lelei tele – tamaiti e, e le na o le Aso Sa e tataua ona e tago ai i lau Tusi Paia. O se mea lelei tele lou faitau i le Tusi Paia, i nisi o ou taimi avanoa i lou aiga.

O le tatou mataupu o lenei Aso Sa, ua faamatalaina ai le oo atu o le talaiga o le Tala Lelei a Paulo ma Sila i le nuu o Perea. Ua la ulufale i totonu o le sunako o tagata Iutaia, e a’oa’o ma lauga atu ai le Upu a le Alii (le Tusi Paia). Sa lagona lo la fiafia i le talia lelei o i laua ma le talaiga e tagata o le aai. O le la molimau i ai, e sili atu ona amio lelei tagata Perea nai lo tagata Tesalonia faatoa o ese mai ai.

O le folafola ma a’oa’o atu Paulo ma Sila i le Tala Lelei i totonu o Perea, sa taliaina lava ma le fiafia tele le upu a le Alii e tagata. Sa mafai ona latou faitau i Tusi ma sailiili i ai. Sa latou suesue i le Tusi Paia, pe moni mea ua tusia ai, e faamaonia ai a’oa’oga ua a’oa’oina ai latou e Paulo ma Sila. O aso na i ai Paulo ma Sila i lea nuu, sa faaosofia lava tagata e omai e faalogologo ma suesue i le Tusi Paia. O le mea lea na faatupulaia ai le to’atele o tagata na talitonu ma faatuatua i le Tala Lelei, e oo lava foi i tamaitai taua o Eleni sa i lea nuu, faapea foi ma tane e toatele.

Tamaiti, o ia taimi faatoa-talaina le Tala Lelei i nuu ese, sa i ai lava foi ma tagata na tetee ma faatuiese ai. E ui i le lelei o le galuega a Paulo ma Sila, ae na i ai lava faafitauli i le taumafaiga. O tagata Iutaia o i Tesalonia ua omai faatupu le vevesi i le motu

o tagata, e teena ai le talaiga. Ae le i manumalo i ai. Ua ave e le au uso talitonu i le Upu a le Alii ia Paulo i le nuu o Atenai, ae tuua ai pea na o Sila ma Timoteo i Perea. Mulimuli ane ona toe faatasia lea o i latou i Atenai.

Tamaiti, e ese le tele o tala taua ma a'oa'oga aoga mo i tatou o i le Tusi Paia, le Upu a le Alii. O lo tatou faitau soo i le Tusi Paia, tatou te iloa ai ma malamalama i le finagalo o le Atua mo i tatou, aemaise lona alofa ia i tatou lana fanau.

### Upu Faamalamalama:

- (i) Tesalonia & Perea - o nisi o aai i Maketonia
- (ii) Atenai - o se aai e lata i Korinito i totonu o le itumalo o Akaia (vaai le faafanua i tua o lau Tusi Paia). O se aai taua tele Atenai, auā na ogatotonu i ai tu ma aganuu a Eleni. Aemaise o se nofoaga na nonofo ai tagata popoto i suesuega o le poto i uiga o mea fou o le natura faapea foi a'oa'oga o le mafaufau.

### GALUEGA FAATINO: (Taliga Fesili)

- 1. O fea le nuu na tala'i ai Paulo, a o lei malaga atu i Perea?  
Tali: O Tesalonia
- 2. O le a le fale na lauga ma a'oa'o atu ai Paulo i Perea?  
Tali: Sunako o tataga Iutaia
- 3. Aisea na talia ai ma le fiafia e Perea le upu a le Atua?  
Tali: Aua o tagata amio lelei

4. Na fiafia tagata e sailiili i tusi. Aisea?

Tali: Fia iloa pe moni mea ua tusia ai.

5. O le vevesi na tupu i tagata ona o le talaiga, na faaosso e ai?

Tali: Na faaosso e tagata Iutaia mai Tesalonia

6. O fea le aai na agai i ai Paulo ma le malaga ina ua tuua Perea?

Tali: O Atenai.

**PESE:** Toe faamanatu le pese o le Aso Sa ua te'a

### A'OA'OGA:

- 1. Fiafia e sailiili i le Tusi Paia
- 2. Ia amio lelei ae lē o le faatupu vevesi.

.....

**ASO SA: 31 MATI 2019**

**MATAUPU: TALITONU INA UA VAAI TINO**

**SINI:** Ia malamalama le vasega, e taua tele le vaai tino i se mea, e tupu ai le loto talitonu ma le faatuatua.

**TUSI FAITAU:** 1 Tupu 10: 1 – 9

**FESOASOANI MO FAIAOGA:**

Ina ua iloa e le tupu fafine o Seepa, tala aave mai o Solomona le tupu o Isaraelu, ona ia manatu lea sei alu lava e tofotofo o ia i upu faigatā. Ua o i Ierusalemā le tupu fafine ma lana au malaga toatele lava, faapea ma kamela o loo aumai ai mea e tele, pei o mea manogi, o auro ma maa taua e fai meaalofoa ai o ia ia Solomona. Na feiloai ma talatalanoa le tupu o Seepa ma Solomona, ma faailoa atu e le tupu fafine mea uma o i lona loto, e fia molimau i ai pe moni tala na oo atu ia te ia.

Tamaiti, na feiloai i laua ma faamatala atu loa e Solomona ia te ia ana mea uma. Ua leai lava se mea na faalilo e Solomona i le tupu o Seepa, ae ua ia tau atu mea uma e molimau i ai le tupu fafine i le moni o tala na faalogo i ai.

Na maofa ma ofo le tupu fafine i mea na ia vaai atu i ai. Ua ia malamalama foi, o le poto lava o Solomona ma lona tamaoaiga na faia ai nei mea uma. Ua molimau o ia i le matagofie o le fale o le tupu na faia lava e Solomona. O taumafa eseese i luga o lana laulau ua matua faatulagaina lava i se vaaiga matagofie. E oo lava i lana silasila atu i le nonofo mai o auauna a Solomona ma le auaunaga a lana au tautua ma o latou laei, e te'i ai lana vaai i le faatulagaina.

E le gata i ia vaaiga fou i le silasila a le tupu tamaitai, ae faapea foi i le gaioi o tautu uaina, ma le matagofie o le ala agai a'e i le fale o le Alii. O vaaiga matagofie nei e tele na te'i ai le vaai a le tupu tamaitai, ma foliga ai ua lē magagana.

O le tele o tala na faalogo i ai le tupu tamaitai e faatatau ia Solomona ma lona poto, na ia lē taliaina lava a o i ai i lona nuu. Peitai ina ua sau ma vaavaai i ai ona mata, na ia iloa ai, e itiiti mea na tala'iina atu ia te ia, ae tele mea ua oo mai ma vaai i ai. Ua ia tautino atu foi ia Solomona ma luma o tagata, ua sili lava le poto o Solomona ma lona manuia. Na ia molimau atu foi ma fa'aamuia i auauna a Solomona, auā latou te tutū i luma o le tupu e le aunoa ma faalogo i lona poto. O le faafetai foi a le tupu tamaitai e agai lea i le Alii le Atua o Solomona ma Isaraelu,

aua na Ia faanofo ia Solomona i le nofoalii o Isaraelu, ma faia lana faamasinoga tonu mo ona tagata. O le poto foi ma le tamaoaiga o Solomona, na tuu i ai e lona Atua.

Tamaiti, e taua lo tatou vaai tino i le matagofie o mea o lenei lalolagi, e a'oa'oina ai tatou ma talitonu ai i mea ua faia e le Atua mo lo tatou ola. O le matagofie o mea na faia e Solomona, ona o lona poto mai le Atua. O le pogai lea e taua ai le poto, auā tatou te iloa ai faatino nisi galuega e maua ai manuia mo i tatou ma o tatou aiga. O lo tatou Alii o Iesu, o Ia lava o le poto silisili.

### **GALUEGA FAATINO:** Taliga Fesili

Tali mai fesili nei faatatau i le tala.

1. Aisea na asiiasi ai le tupu fafine o Seepa i Ierusalemā?

Tali: Fia tofotofo ia Solomona i upu faigata

2. O ai na o ma le tupu fafine?

Tali: O le au malaga e matua toatele

3. O a mea na faamatala ma ta'u atu e Solomona i le tupu fafine o Seepa?

Tali: O mea uma lava sa i lona maota

4. O a ni mea na iloa e le tupu fafine i le maota o Solomona?

Tali: - Maota na ia faia  
- Meaai i luga o le laulau a Solomona  
- Nonofo o ona auauna  
- Galulue o ana tautua ma o latou ofu  
- O tautu uaina

- O le auala i le fale o le Alii

5. O le a sou iloa, o le a se lagona na oo ifo i le tupu fafine ina ua vaai tino ona mata i mea na faia i le poto o Solomona?

Tali: Na ofo i le poto o Solomona

6. Aisea na fa'aamuia ai le tupu o Seepa i auauna a Solomona?

Tali: Auā e le aunoa le latou tutū i luma o le tupu, ma faalogo i lona poto

7. O le a le tiute taua o Solomona na tofia ai o ia e le Atua e fai ma tupu ia Isaraelu uma?

Tali: Faamasino ma le tonu ia Isaraelu

**TAULOTO:** A'oa'o le tauloto lea.

1. Le tupu fafine o Seepa fia tofotofo  
I le tupu o Solomona ma lona poto  
Na faailoa atu mea uma sa i lona loto  
Ua na o le u'u o le gutu ua ofo
2. Solomona na te le i natia se mea e tasi  
O lona poto, tamaoaiga ua fa'aali  
Le tupu fafine ua vaavaai atu i ai  
I isi mea e tele e lei logoina mai
3. Amuia au auauna Solomona  
E le aunoa ona faalogologo i lou siufofoga  
E a'oa'o ai ma ao'oga  
Ae sili lava Iesu ma lona alofa.

**A'OA'OGA:**

1. Talitonu i faamanuiaga mai ou matua.
2. Vaai, faalogo ma faitau le Tusi Paia e te talitonu ai
3. Ia a'oa'o ina oe i mea lelei ua e vaai i ai.

.....

**MANATU AUTU APERILA: IA ILOA MEA TAU**

I le olaga nei, e soifua a'e lava le tagata ia mai lona aiga, o ina e a'oa'o ina muamua mai lava e ona matua ma tagata o lona aiga, ma faasolo atu ai lava i nisi o a'oa'oga seia oo ina matua. Peita'i, e ao ona iloa ma taofi mau mea taua. O mea taua, o mea ia e aoga mo le olaga o le tagata, e puipuia ai le tagata mai le faia o mea sese e tupu ai le agasala. O le taua lea o lo tatou malamalama ma iloa mea taua mai le Afioga a le Atua, e taiala ai o tatou olaga i le manuia.

.....

**ASO SA: 7 APERILA 2019**

**MATAUPU: E PULE LE ALII I MEA UMA**

**SINI:** Ia malamalama tamaiti, o le lalolagi ma mea uma o iai e pule ai le Atua. Auā foi o le Atua na ia faia mea uma.

**TUSI FAITAU:** Salamo 24: 1 – 2



## FESOASOANI MO FAIAOGA:

O le mataupu amata o lenei masina, o lo o faamanatu mai ai pea ia i tatou le fanau, e ao ona tatou iloa mea taua o le olaga nei, aemaise ai, ia iloa lē na faia mea uma i lenei lalolagi.

Tamaiti, afai o le Atua e ou mea uma na ia faia, o lona uiga o le Atua e pule i mea uma e aofia ai ma i tatou. O le ala lea e tatau ai lava ona ofoina o tatou ola e auauna ai mo le Atua, auā o Ia na faia i tatou, ma o le isi lea o tatou tiute o le tausia lelei lea o so o se mea o le foafoaga ua faia e le Atua.

O le tusi sa o tatou faitauina o le Salamo a Tavita. E iai le talitonuga o le salamo lenei e faamanatu ai le aveina a'e ai o le atolaau a le Atua mai le fale o Opete Etoma i Ierusalema (2 Samuelu 6: 10 – 12). Ua silafia lelei e Tavita, o le i i o le atolaau a le Atua faatasi ma lona nuu, o le iai lava lea o le Atua faatasi mai latou. O le atolaau o lo o iai i totonu le to'oto'o o Arona faatasi ai ma papa maa o lo o tusia ai tulafono a le Atua lea ua tuuina ifo ia Mose e limata'ita'ina ai lona nuu. O le faailoga o le paia ma le mamalu o le Atua, e auai faatasi ai ma ona tagata.

O le Agaga o le loto fia vivii ma faafetai o Tavita aua ua mautinoa a faatasi ma le Atua ona maua lea o faamanuiaga eseese. Ioe e mautinoa le anoanoai o faamanuiaga tatou te maua pe afai tatou te faamuamua le Alii. O le Alii e pule i mea uma. O le Alii na te foa'i mai faamanuiaga ia i tatou pe afai tatou te fiafia e ola vivii ma ola faafetai ma faamuamua o Ia i o tatou ala uma. Ia tatou iloa lelei e pule le Atua i mea uma, e oo a i lo tatou ola.

## GALUEGA FAATINO: Taliga Fesili

Faamatala mai poo le a le uiga o le pule a le Alii i mea uma?

**PESE:** A'oa'o le pese lea

Le Atua o le pule silisili  
I mea uma i le lalolagi  
E tatau ona ta tausia  
Aua ua ta fa'aaoga  
Talitonu nei i le Tama i luga  
O le alofa mo i ta'ua

(fati – pese a tamaiti – A,B,C,D,E,F,G, .....)

## A'OA'OGA:

1. O le Atua e pule aoao i mea uma.
2. Ia usita'i ma faalogo i le Atua
3. Ia toaga e vivii ma faafetai i le Atua.

.....

**ASO SA:** 14 APERILA 2019

**MATAUPU:** IA FA'AALOALO IĀ IESU  
(ASO SA LAUPAMA)

**SINI:** Ia malamalama tamaiti i le taua o le ola fa'aaloalo auā o le tu ma le aganuu lea faa-Samoa moni. Ia fa'aaloalo i so o se tasi aemaise ia fa'aaloalo i le Alii o Iesu lo tatou tupu.

**TUSI FAITAU:** Mataio 21: 1 – 11

## FESOASOANI MO FAIAOGA:

Talofa tamaiti. O ai na te manatua, o le a se mea o faamanatuina i le Aso Sa lenei? Ioe, o le Aso Sa lenei o le laupama a tamaiti? Ioe, o lea sa faitau i ai tatou ma iloa ai le uiga o le tusi sa faitauina. O le tusi e faatatau i le malaga faatupu a Iesu i Ierusalema. Manatua o le malaga a Iesu i Ierusalema o le malaga faatupu, ma, o le malaga ulufale manumalo foi lea a le Alii o Iesu i Ierusalema (triumphal entry), e tauluga ai lana galuega faamisionare i le lalolagi, e ala i lona maliu ma lona toetu manumalo mai le oti ma le tuugamau.

O le faataunuina foi lea o valoaga a perofeta e pei o Sakaria i lana tusi, (Sakaria 9:9) lea na valoia ai e Sakaria le malaga faatupu manumalo a le Alii o Iesu e tietie atu o ia i le tamai asini. Ioe, o lea lava na ta'ua i le molimau a Mataio le faatonuina ai e Iesu o ona soo e toalua, e o atu i le nuu o lumanai ma o la tatalaina mai ai le asini o lo o iai. Tamaiti o lea lava na taunuu mea uma e pei ona valoia e perofeta. Fai mai o tagata foi na iai ua o latou fola o latou ofu atoa ai ma lau o laau i le ala a'o tietie atu Iesu i le tamai asini, e agai atu i Ierusalema. Ua alalaga foi i latou "Osana i le alo o Tavita, ia manuia le afio mai i le suafoa o le Alii" Fai mai o nisi latou te le'i iloina Iesu sa fesili poo ai lea, ae ua faailoa atu e le motu o tagata o Iesu lea o le perofeta mai Nasareta i Kalilaia. Tamaiti e ese le taua o le ola fa'aaloalo e pei ona faia e tagata i le Alii o Iesu. Ia faapea foi tatou ona o tatou ola fa'aaloalo i o tatou matua atoa ai ma i latou o e matutua atu ia te i tatou.

### Uiga o Upu:

i) osana - faaola mai

- ii) perofeta - auaua a le Atua na te valoia ma ta'u atu i tagata le finagalo o le Atua.
- iii) laupama - lau o le laau o le pama

**GALUEGA FAATINO:** Faatino le tala

**PESE:** Osana pepese tamaiti uma

### A'OA'OGA:

1. Ia faamasani i le ola fa'aaloalo.
2. Ia fa'aaloalo ma ava i matua
3. O Iesu o le tupu o tagata uma.

.....

**ASO SA:** 21 APERILA 2019  
(ASO SA TOETU)

**MATAUPU:** NA MALIU IESU AE NA TOETU

**SINI:** Ia malamalama tamaiti o le Toetu mai o Iesu mai le oti ma le tuugamau o lona faia lava lea o le togiola mo tagata uma.

**TUSI FAITAU:** Ioane 20: 1 – 18

## FESOASOANI MO FAIAOGA:

Talofa tamaiti o a mai outou i lenei taeao? Manatu o lo o manuia uma tatou le fanau i le alofa o le Atua a tamaiti? Lelei.

O ai na te iloa o le a se mea faapitoa o loo faamanatuina e le au Kerisiano i le Aso Sa lenei?. Lelei, o le Aso Sa lenei o le toetu manumalo mai o lo tatou Alii Faaola o Iesu mai le oti ma le tuugamau a tamaiti?. O le tala ua masani ai tatou e pei ona molimauina mai e Mataiao atoa ai ma nisi o le au fai Evagelia. Fai mai ao le'i malamalama lelei le uluai aso o le vaisapati, na alu ane ai Maria le Makatala e asi le tuugamau o Iesu. Na faate'ia o ia ina ua ia vaai atu ua leai se maa na pupuni ai le gutu o le tuugamau. Na ia tamoe ma tau atu ia Simona Peteru ma Ioane ma lona manatu ua ave e nisi le tino maliu o le Alii. Sa molimauina foi e Simona Peteru ma Ioane lea tulaga ina ua o la oo ane i le tuugamau ma iloa ai ua toe na'o ie ma le solosolo sa i lona ao. Sa toe foi i laua ma le lē mautonu a'o Maria ua tagi ai lava o ia i le tuugamau. Sa faateia o ia ina ua ia vaaia ni agelu se toalua o loo nonofo mai i totonu o le tuugamau i le mea sa iai Iesu. Ua o la fesili ane foi ia Maria pe aisea ua tagi ai o ia? Na tali atu Maria ua tagi ona ua ia le iloa poo fea ua ave i ai e tagata le tino maliu o Iesu. Sa toe faliu Maria i tua ae ona vaaia ai Iesu peitai na te le'i iloina o Iesu lea e fesili atu ia te ia poo le a le mafuaaga ua tagi ai? Sa tali Maria na te fia iloina tonu poo fea ua o latou ave iai lona Alii. Ina ua fetalai atu Iesu Maria e, o iina na iloa ai e Maria Iesu ma ia fai ane ai Raponi e, o lona uiga le a'oa'o e. Ua toe fetalai Iesu ma tau atu e Iesu; o ia e alu a'e o Ia i lona Tamā ma lo tatou Tamā, o lona Atua ma lo tatou Atua. Ioe, sa ta'u uma e Maria i le au-so'o mea uma na ia vaaia e uiga iā Iesu Toetu. O le faailoga o le pule aoao a le Alii o Iesu atoa ai ma lona manumalo a'ia'i ai i le oti ma le tuugamau.

**GALUEGA FAATINO : Faatino le tala**

Faatino le tala o le Toetu. Tofi se tamaitai e fai ma Maria, atoa ai ma nisi e fai ma Simona, Peteru, Ioane, Agelu e toalua, Iesu,

faapea ma le au so'o, ma faatino le tala e pei ona molimau mai ai Ioane i le tusi sa faitauina.

**PESE:** Pese ma Viiga (51) Sauni ia le pese fou

**A'OA'OGA:**

1. Ia faatuatua ma talitonu i le Toetu mai o le Alii o Iesu.
2. O le Toetu o le faamoemoe ola lea mo i tatou uma.
3. Ia tumau i le faaolataga ua faia e Iesu mo i tatou.

.....

**ASO SA: 28 APERILA 2019**

**MATAUPU: E LE TUTUSA LE ATUA MA SE TUPUA**

**SINI:** Ia malamalama e tulaga ese a le Atua. E le tutusa le Atua ma tupua, auā o tupua o ni faatusa ia ua faia e tagata, e leai se ola o iai. O le Atua e Silisiliese lava ia e mamalu ma o loo soifua pea e oo i le faavavau.

**TUSI FAITAU:** Teuterenome 4: 15 – 20

**FESOASOANI MO FAIAOGA:**

Talofa tamaiti. Tatou viia pea ma faafetaia le alofa o le Atua ua tatou aulia mai foi lenei taeao mo la tatou aoga a tamaiti? Lelei, o ai na te iloa o ai foi na tusia le tusi lenei o Teuterenome? Sa'o

lelei a tamaiti, o le tusi a Mose. O le vaega la o le tusi sa faitauina o loo faamamafa ai e Mose ma faamanatu i le nuu o le Atua, aua nei o latou faia ni tupua e tapuai i ai. O tupua tamaiti, o mea ia ua mafai ona fauina e tagata mai nisi o mea faitino e pei o ogalaau, o uamea, o maa atoa ai ma nisi o mea eseese e pei foi o le auro, o le pulu, ma nisi lava mea e mafai ona gaosia ai ni faatusa o ni mea eseese oi le lalolagi. O tupua e leai se ola o iai, e le mafai foi ona aai pe feinu ni tupua, ia pe tautatala foi ma feoi e pei o tagata. Peitai ua faatauina ma talitonuina e nisi o tagata latou te tapuai ma auauna iai. O tu ma aga faapaupau ia e le finagalo ai le Atua ona faia e lona nuu. Tamaiti lea sa o tatou faitau i ai i le tusi ma o loo matua faamamafa mai ai e le Atua fautuaga i lona nuu e ala mai i lana auauna o Mose ina ia faailoa i tagata o lona nuu e aua lava nei o latou faia ni faatusa o ni mea oi le lagi ma le lalolagi latou te tapuai iai, ae tau lava o le Atua e toatasi o Le na aumaia i latou mai Aikupito o le nuu sa nofo pologa ai ina ia o latou auauna ma tapuai i le Atua Soifua e toatasi. Ioe e faapena foi tatou tamaiti. Ua na’o le Atua foafoa, o Ia o le Atua le Tamā, Le Alo, ma le Agaga Sa e ao ona o tatou auauna ma tapuai iai, auā o Ia o le pogai atoa ai ma le puna o faamanuiaga mo lo tatou ola.

**Uiga o Upu:**

- i) Horepa - mauga (na fa’aali ai le Atua i le nuu o Isaraelu e ala i le afi)

**GALUEGA FAATINO:**

Tusi mai ni solo, e faailoa mai ai le eseese o le Atua ma tupua. Tau o le 2 fuaiupu ae tai 4 laina i le fuaiupu.

**PESE:** Le Atua e matautia

**A’OA’OGA:**

- 1. ‘Aua le ifo i tupua.
- 2. Ia tumau i le talitonu i le Alii
- 3. Ia faalagolago ma faatuatua i le Alii e manuia ai.

.....

**MANATU TAIALA O ME: FILIFILI IA SUI**

O lenei masina ua tatou iai i le manatu taitala “Filifili ia sui” O le uiga tonu o lenei manatu, ia filifili le tagata ia suia lona olaga tuai i se suiga lelei. Afai sa faaletonu lona uiga ua tataua ona filifili ia fai ma tagata fou. O le upu moni o le tagata ua talia le Alii i lona olaga o le tagata fou lea, ua ia te ia le ola.

**ASO SA: 5 ME 2019**

**MATAUPU: SU’ESU’E MUAMUA OE**

**SINI:** Ia malamalama tamaiti i le fai mea tonu e tusa ma le finagalo o le Alii o Iesu. O le taua lea o le toaga i le Aoga Aso Sa ma le lotu. Ia faamaoni ai e tausia aiaiga faale-Ekalesia o le avea ma tagata o le aiga o le Atua, auā o le Ekalesia o le tino ia o Keriso. O Keriso o le Ao o le Ekalesia.

**TUSI FAITAU:** 1 Korinito 11: 27 – 32

**FESOASOANI MO FAIAOGA:**

Talofa tamaiti, tatou viia pea lava ma faafetaia le alofa ma le agalelei o le Atua ua mafai ai ona tatou aulia mai foi lenei Aso Sa o le tatou aoga a tamaiti? Sei fai faatasi mai le tatou mataupu “Su’esu’e muamua oe.”

Tamaiti, so o se mataupu lava e taua le iloa ma manino atoatoa, ina ia malamalama i lona faapogai ma lona uiga ma le taua mo i tatou. E manaomia ai la ona su’esu’e, sailiili ia pe tuu fesili foi i lē ona le mataupu ona faatoa mautinoa lea ma malamalama i mea uma e faatatau i lea mataupu.

O le tusi sa faitauina, o le tusi a Paulo e uiga i le mataupu o le talisuaga Paia a le Alii. The Lord supper (Holy Communion) (Thanksgiving / Eucharist) O loo taua ai le tulaga i le ai ma le faaletatau i le talisuaga Paia a le Alii.

Tamaiti, o le uiga tonu lea o la tatou mataupu “Suesue muamua oe.” O loo taua e Paulo le ao ona faatau e le tagata le talisuaga Paia a le Alii, seiloga lava ua faaetia po ua faa-Ekalesiaina le tagata ona faatoa ia talia lea o le talisuaga paia a le Alii. E le tatau ona soona ai ai se tasi auā e faamasinoina le tagata i le faaleagaina o le tino ma le toto o le Alii o Iesu. O le ala lea e taua ai lou suesue muamua o oe poo alagatatau ona e talia le talisuaga a le Alii. O loo taua e Paulo o le mafuaaga lea e ala ai ona mama’i nisi o nuu e toatele ona o le aai ma le faaletatau i le tino ma le toto o Keriso. Tamaiti, e taua lo tatou tausia lelei o aiaiga faale-Ekalesia ina ia ola faapaiaina i tatou ina ia tatou maua ai faamanuiaga eseese mai le Alii.

O le suesue ifo o le tagata ia te ia lava, o le mafaufau lea o le tagata ma to manatu, pe na te lei faia se agasala poo se amioga lē tatau e tusa ma le silasila mai o lo tatou Alii. O le Alii e ati lana silafaga i mea uma tatou te faia.

### **Uiga o Upu:**

i) faaletatau - lē amiotonu, sese

**GALUEGA FAATINO:** Taliga Fesili

Tali mai i le fesili lea:-

O a ni amioga e le tatau ona tatou faia, ao lei taliaina le Talisuaga a le Alii?

ft - palauvale

**PESE** : Lou Atua e ua ou fia ai ia e fafaga i a te au.

**A’OA’OGA:**

1. Ia fiafia e fai mea lelei mo le Alii o Iesu.
2. Ia talia Iesu e avea ma Alii ma Faaola
3. O Iesu le areto o le ola.

.....

**ASO SA:** 12 ME 2019 (ASO SA TINĀ)

**MATAUPU:** O LE FAFINE MATIVA LOTO FOA’I

**SINI:** Ia malamalama le vasega i le taua o le loto foa’i. Ia tausisi i le loto alofa e pei ona a’oa’o mai Iesu ia i tatou.

**TUSI FAITAU:** Mareko 12: 41 – 44

## FESOASOANI MO FAIAOGA:

Talofa tamaiti! O a mai outou i lenei taeao? Lelei, Faafetai i le Atua ua tatou aulia mai foi lenei Aso Sa auā le fa'aauauina o le tatou aoga a tamaiti. Ia lelei, o ai se tamaitiiti na te iloa o le a se mea o faamanatu i lenei Aso Sa? Ioe sao lelei a tamaiti. O le Aso Sa lenei e faapitoa mo tatou tinā a tamaiti?. O ai la o iai sana meaalofa mo lona tinā? Lelei, o le meaalofa sili lava o le usitai ia tinā ma fesoasoani ia tinā i soo se mea a tamaiti. Ia lelei.

O le tatou mataupu i lenei Aso Sa tamaiti, fai faatasi “O le Fafine Mativa Loto Foa’i” Ioe, lea sa faitau tatou i le Tusi Paia i le tala a tamaiti. Ioe fai mai sa iai Iesu i le malumalu ma sa ia maitauina ai tagata o loo agai atu e lafo a latou foa’i i totonu o pusa e fai ma a latou taulaga i le Alii. Fai mai e toatele ē mauoloa na lafo a latou taulaga, o tupe e tele, ae sa iai foi se fafine mativa na alu atu o ia ma lafo uma ana tupe laiti e lua sa totoe ia te ia e ola ai, e fai ma na taulaga i le Alii. Mulimuli ane ua fetalai Iesu i ona soo mana ta’ua ai, e sili atu le taulaga a le tinā mativa lenei nai lo o taulaga tetele na lafoina e i latou e mauoloa. Na ta’ua e Iesu o i latou ia e mauoloa, latou te lafo nisi tupe mai le tele o a latou tupe, ae faatotoe nisi o a latou tupe, a o le fafine mativa ua ia lafo uma ana tupe laiti na iai a ua leai se tupe o totoe e ola ai o ia. Tamaiti fai mai na matua viia e Iesu le foa’i a le tinā lenei. O le faailoga o le ave atoa o lona ola e faitaulaga ai i le Alii. Ioe, o le tulaga lena e tatau foi ona iai tatou a tamaiti! E tatau ona ave atoa lo tatou faatuatuaga aemaise lo tatou ola ma lo tatou malosi e auauna ai mo le Alii. Tamaiti o le foai ua faia e lenei tinā, e a’oa’o ai foi tatou. O isi tamaiti, e lē avea uma lana sene na avatu e matua e lafo i le aoga Aso Sa. E nana e lē lafoina. E tatau ona tatou faataitai i le foa’i a lenei tinā. Pe laitiiti lau tupe o iai, ia lafo uma, auā e silafia e le Alii mea uma ua tatou avatu i le lotu.

## GALUEGA FAATINO:

Tali mai fesili nei:

1. Aisea e sili ai i le manatu o Iesu le foa’i a le fafine mativa nai lo o le foa’i a e mauoa sa lafoina?

Tali: Aua sa foa’i uma e le fafine mativa ana tupe na totoe ia te ia mo le Alii.

2. O le a se feau ua ta’u mai i lenei tala mo i tatou le fanau?

Tali: Ia fiafia e foa’i ma fai mea sili mo le Alii

**PESE:** Lafo ia lau sene  
Lafo, lafo pea  
Taitoatasi mo Iesu  
Na te talia mai.

## A’OA’OGA:

1. Ave atoa lo tatou ola mo le Alii
2. Ia tatou loto alofa ma loto foa’i i e matitiva
3. Ia usita’i i faatonuga a matua i le Alii.

.....

**Ia manatua – E malolo le Aso Sa Fono Tele, 19 Me 2019.**

**ASO SA:** 26 ME 2019

**MATAUPU:** LILIU I LE ALII E SAOLOTO AI

**SINI:** Ia malamalama le vasega, ia liliu ese mai mea faaletonu ma mea e lē lelei, ae faamuamua le Alii e saoloto ai mai puapuaga ma faafitauli o le olaga.

**TUSI FAITAU:** Galuega 3: 17 – 23

**FESOASOANI MO FAIAOGA:**

Talofa tamaiti! O a mai outou i lenei taeao? Ia tatou viia pea ma faafetaia le alofa ma le agalelei o le Atua i lana puipuiga ma lana tausiga alofa ia i tatou a tamaiti? Ua tatou aulia mai le Aso Sa faaii o lenei masina. O ai o manatua le tatou manatu taiala o le masina lenei o Me. Ioe, fai faatasi “*Filifili ia sui*” E faapena le tatou mataupu i lenei Aso Sa; Liliu i le Alii e saoloto ai. Tamaiti e tai uiga tutusa le upu sui ma le upu liliu, afai sa lē usita’i tatou ma faia uiga lē lelei, e tataua la ona sui, aua le toe faia na uiga ae liliu ma foi i le Alii e saoloto ai. O le uiga o le saoloto o le saogalemu mai o tatou mai aafiaga o mailei a le fili ma le tiapolo e afaina ai tatou.

E faapena le tala o galuega a le au Aposetolo o loo taua e Luka i lana tusi sa tatou faitau iai. O le lauga a Peteru i tagata Iutaia, aua na latou faaumatia perofeta a le Alii e oo lava foi ia Iesu na o latou faasatauroina o Ia. O nisi ia o upu o le lauga a Peteru na ia faamanatu i le nuu o le Atua mea faaletonu sa o latou faia. Sa faamamafa e Peteru le salamō ma ia liliu ese mai le agasala e pei ona taua i le fuaiupu 19. Peita’i sa faia pea e Peteru ma Ioane faamalologa e pei foi ona faia e Iesu auā sa faatumuina i laua i le Agaga Paia. O le faanaunaga lea o Peteru ia salamō ma liliu

ese mai i latou mai o latou talitonuga sēsē o loo taofiofimamau i ai, ae liliu i le Alii e saoloto ai mai le agasala.

E faapena foi tatou a tamaiti? Afai e faaletonu le tulaga o loo iai tatou, na o le pau lea o le auala tatou te saogalemu ai o le liliu i le Alii e saoloto ai i tatou mai faigata ma puapuaga. Talia Iesu e fai ma Alii ma faaola i o tatou olaga ona manuia lea o i tatou ia tatou taumafaiga uma.

**GALUEGA FAATINO:** Tali i fesili ua tuuina atu.

1. O ai e ona le lauga lea sa tatou faitau iai mai le Tusi Paia?

Tali: O Peteru o le so’o o Iesu.

2. O le a le mea o loo faamamafa mai e Peteru?

Tali: O le salamō ma foi i le Alii e manuia ai.

3. E faapefea ona salamō le tagata?

Tali: Liliu ese mai le agasala aua nei toe faia, ae foi i le Alii e saoloto ai.

**PESE:** A’ea’e i luga o mauga.

**A’OA’OGA:**

1. Fulitua i le leaga ae foi i le Alii.

2. Toaga e tatalo i le Atua.

3. Faalogo ma usitai i auauna a le Atua.

.....

**MANATU TAIALA IUNI: O LE A LE UIGA O LE OLA AUAUNA?**

O le upu auauna e uiga tutusa lava ma le upu tautua. O lona uiga o le tuuina atu poo le ofoina atu lea e se tasi o lona tagata atoa, e auauna ma tautua ai e ala i le faatinoina o so o se feau ma so o se galuega lelei, e tusa ma le finagalo o lona matai poo lona taitai foi. O le auauna lava ia e tautua lelei ma galue faamaoni, e mautinoa lava e maua e ia faamanuiaga e tele.

**ASO SA:** 2 IUNI 2019

**MATAUPU:** GALUE I LE FAASINOGA A IESU

**SINI:** Ia a’oa’o fanau ia fiafia e galue faamaoni ma faamoemoe i le faasinoga a Iesu, e taitaiina ai i latou i faamanuiaga eseese.

**TUSI FAITAU:** Ioane 13: 12 – 16

**FESOASOANI MO FAIAOGA:**

I le vaega lava ia o le Evagelia a Ioane sa faitauina o loo a’oa’o atu ai Iesu i ona so’o, e faatatau i le galulue faatasi ma femulumuluai. Ua tuua e Iesu lona tulaga o ia o le Alii poo le taitai o le au so’o, ae ua ia faatinoina lava se galuega pito i sili ona maulalo, o galuega ia e faia e pologa a e maumea i na ona po. Sa lē mautonu le au so’o ina ua faatino e Iesu le mulumuluina o latou vae, peita’i, na fetalai Iesu o se faasinoga taua lea poo se faataitaiga sili lea o le tulaga e tatau ona iai i latou ao feagai ai ma le galuega faamisionare. O le finagalo o Iesu ia ave a i latou ma auauna i tagata pe a o latou o atu e fai le galuega o le tala’iina o le Tala Lelei o le faaolataga. O le

auaunaga e moomia ai le femulumuluai ma le galulue faatasi. Ua silafia e Iesu e iai le taimi e tuua ai e ia lona au so’o ao lea ua ia faailoa le tulaga e tatau ona faatinoina ai le galuega. Tamaiti e faapena foi le finagalo o lo tatou Alii mo i tatou. E tatau ona o tatou galulue faatasi ma fesoasoania’i, alofa le isi i le tasi. O le faailoga lava lea o lo tatou alolofa i le Atua, pe afai tatou te galulue i le faasinoga a Iesu e pei ona a’oa’oina ai i tatou.

**GALUEGA FAATINO: Faatinoga**

Faatino e le vasega le mulumuluga o vae o le au so’o. O le e faatinoina le vaega a Iesu ia toe fai uma e ia upu o loo taua i le tusi sa faitauina.

**PESE:** 199 (Pese ma Viiga)

**A’OA’OGA:**

1. Ia loto maulalo i le faatinoina o le finagalo o Iesu
2. Ia fai i tatou ma auauna faamaoni.
3. Ia galulue faatasi e faigofie ai mea uma.

.....

**ASO SA:** 9 IUNI 2019

**MATAUPU:** AUAUNA MA FAAMOEMOE I LE ATUA

**SINI:** Ia malamalama le vasega i le tele o faamanuiaga e maua, e ala mai lea i le tuu atoa o le loto i le Atua auā o ia lo tatou



fesoasoani, tatou te mafai ai ona fai mea uma.

**TUSI FAITAU:** Kenese 31: 36 – 44

### **FESOASOANI MO FAIAOGA:**

Tamaiti o le tala foi ia te ai lea sa tatou faitau iai i le Afioga Paia a le Atua? Ioe, o le tala ia Iakopo ma lona aiga a tamaiti? O le tala ua masani ona faalogo soo ai tatou, ae o le vaega lea o le tala i le taimi sa nofo ai Iakopo ia Lapana le tuagane o lona tinā, o Rasela. O tulafono a le nuu o Isaraelu e le faatagaina ona faaipoipo se tagata Isaraelu ma se tagata o se isi nuu. O le ala lea na nofo ai Iakopo i se taimi umi ia Lapana ina ia maua ai se avā poo se toalua mo ia. E taunuu atu Iakopo e tau le tele se tamaoaiga o Lapana o iai, ae ina ua galue loa ma auauna Iakopo ia Lapana, sa matuā faatuputeleina lava ona lafu manu ma ona tamaoaiga; Kenese 30: 27. E luasefulu tausaga na auauna ma galue ai Iakopo mo Lapana, peitai sa maitauina pea e Iakopo le lē lelei o Lapana e tusa ai ma la latou mafutaga. O le ala lea na tonu ai loa ia te ia o le a toe foi i lona aiga. Na ave a latou lafu manu faatasi ai ma ona toalua ma ana fanau o ana auauna ma latou tuua loa le aiga o Lapana, auā na fetalai i ai le Atua ia Iakopo. (Kenese 31: 3).

Sa toe tuliloa e Lapana le malaga a Iakopo ma lona aiga talu ai latou te lei faamavae, faatasi ai ma le sueina o lana tupua ua le iloa. Sa le maua e Lapana lana tupua na sueina ai le aiga o Iakopo. E ui a ina sa iai se finauga i le va o Iakopo ma Lapana, peitai sa iai lava le Agaga o le Atua ia te i laua. Kenese 31: 42. Sa toe talanoa lelei i laua ma fai ai loa e i laua se feagaiga ma faamavae lelei ai loa i latou ma le fiafia.

### **GALUEGA FAATINO:**

- 1) E fia atoa le aofai o tausaga na galue ai Iakopo i a Lapana?  
Tali: E 20 tausaga.
- 2) E fia tausaga na auauna ai Iakopo i a Lapana mo ona afafine e toalua?  
Tali: E 14 tausaga.
- 3) E fia tausaga na galue ai Iakopo i a Lapana mo ana manu?  
Tali: E ono tausaga.

**PESE:** Galue ia seia uma ai (Pese ma Viiga)

### **A’OA’OGA:**

1. Faatuatua ma faamoemoe i le faasinoga a le Atua.
2. Galue ma le faamaoni i so o se galuega ua valaauina ai oe e le Atua.
3. E taunuu manuia faamoemoega a e faalagolago i le Atua.

.....

**ASO SA: 16 IUNI 2019**

**MATAUPU: AUAUNA MA LE FIAFIA**

**SINI:** Ia malamalama tamaiti, so o se auaunaga e faia ma le loto fiafia, e taunuu manuia.

**TUSI FAITAU:** Efeso 6: 5 – 9

**FESOASOANI MO FAIAOGA:**

O le mataupu o lenei Aso Sa, o loo faatatau tonu i le va o le auauna poo le pologa ma lona matai. Sa matuā tele naua ia ituaiga faiga i le vaitau lea ao feagai Paulo ma lana galuega faa-Aposetolo. O le taimi tonu foi lea ao tulai mai le malo o Roma sa ia pulea ai le atu Palesitina i na ona po T.A. 14 – 37.

Peitai i le vaega o le tusi sa faitauina, o loo faamalosi atu ai Paulo i vaega eseese o tagata aemaise o pologa i le va ma o latou matai. Ta’ua e Paulo e ao i pologa ona matua auauna ma le faamaoni, aua nei faapei o e faafiafia, a ia auauna ma le lototoa. O auauna Kerisiano ia mafaufau o loo auauna i latou i le Alii ma le lototoa fiafia, auā e tauia lava e le Alii galuega a le tagata e fai mea lelei, tusa lava pe pologa pe saoloto foi.

E faapena foi le faamalosi mo matai poo taitai. O le mea e ao ona manatua o le pologa ma le matai e tasi lava lē na faia i laua ua na o le Atua. O Ia o lo tatou taitai ma lo tatou matai sili. O le mea lea e ao ai ona o tatou auauna ia te ia ma le fiafia atoa ma le faamaoni.

**GALUEGA FAATINO:**

Faamatala mai pe faapefea ona faatinoina e se tasi se galuega ma le lototoa fiafia.

Talanoa ma fetufaai ai mo le vasega.

**PESE:** O maia tatou uma ma mafuta fiafia.

**A’OA’OGA:**

1. E faigofie mea uma pe a faia ma le lototoa fiafia.

2. Ia faamaoni i so o se galuega e tofia ia i tatou.
3. Ia auauna ma le fiafia i le Atua.

.....

**ASO SA:** 23 IUNI 2019

**MATAUPU:** NA O LE ATUA SOIFUA E AUAUNA I AI

**SINI:** Ia malamalama le vasega; e taua le savali fiafia o le tagata i ala o le Atua ma faia lona finagalo.

**TUSI FAITAU:** 1 Tupu 22: 51 – 53

**FESOASOANI MO FAIAOGA:**

O le mavae atu o le nofoaiga a Aapo le tupu o Isaraelu, na soloai ane ai lea lona atalii o Aasaia i le nofoalii o le malo i matu. O le taimi foi lea o fai Iosefatu ma tupu o Iuta i le sefulu ma le fitu o ona tausaga. Na tofia Aasaia e taitai le malo, ina ia auauna ma savavali tagata uma i ala o le Atua. Ia latou auauna faamaoni ma tausisi i poloaiga uma a le Atua, e manuia ai latou.

Na o le lua lava tausaga na fai ai Aasaia ma tupu o Isaraelu, aua na amio leaga i lana taitaiga i luma o le Atua. O lana amio ua pei lava o ala leaga na savavali ai ma auauna ai ona matua, o Aapo ma Iesepela. Na toe faaolaola e Aasaia tapuaiga ia Paala ma faasino tagata e auauna i ai i lea tupua mate. Ma o lona faaonoona lava lea i le Alii le Atua o Isaraelu ma fouvale ia te Ia. O le ala lena na faataga ai e le Atua isi malo e pei o le malo o

Asuria e latou te faasaua ma faapologa i tagata o lona nuu ona ua malosi le ola agasala ma le ifo i tupua.

**GALUEGA FAATINO:** Tautinoga faa-Aposetolo

(E manaia lea taimi e a’oa’o ai ma toe faamanatu i tamaiti le tautinoga faa-Aposetolo, auā e tataua ona latou taulotoina)

**PESE:** Pese ma Viiga 157 (Ave lou ola ia aoga)

**A’OA’OGA:**

1. Aua le ifo i tupua.
2. E puapuagatia le tagata e le usita’i i le finagalo o le Atua.
3. Talia Iesu e fai ma Alii ma faaola i lou olaga.

.....

**ASO SA:** 30 IUNI 2019

**MATAUPU:** AUAUNA I LE ATUA AE LĒ O LE OA

**SINI:** Ia malamalama tamaiti ia faamuamua le Atua i mea uma, ae aua le naunau i tamaoaiga ma oa o i le lalolagi auā o mea ia e mavae ma pala.

**TUSI FAITAU:** Luka 16: 10 – 13

**FESOASOANI MO FAIAOGA:**

Tamaiti o le tasi lenei o faataoto a Iesu e pei ona sa tatou faitau i ai. O faataoto o ni tala faa-faatusa ia o mea i le olaga nei, o loo aumai i se uiga fa’auiga lua, ma o loo aumai ai se feau taua mo’i tatou. O le faataoto la lenei, e faataata i le auauna amioletonu. O loo faamamafa e Iesu i lana faataoto lea le taua o le faamaoni. Fetalai Iesu o lē faamaoni i nai mea iti e faamaoni foi o ia i mea e tele, ao le lē faamaoni i mea iti, e lē faamaoni foi o ia i mea e tele. Afai foi e le faamaoni pe lē amiotonu se tasi i le vaaiga o meatotino a se tagata ese e le mafai foi ona amiotonu o ia i le vaaiga o ana lava mea totino. O loo faatusa e le Alii o Iesu le oa poo le tamaoaiga faale-lalolagi i le oa ma le tamaoaiga faale-Agaga.

O le natura faale-tagata lava ia, e tele ina feteenai ai mea nei e lua, o le oa poo le tamaoaiga o le lalolagi nei ma le oa faale-lagi. O le uiga o lana fetalai e le mafai e le tagata ona auauna i Alii e toalua i le taimi e tasi, aua e iu ina fiafia o ia i le isi ae inoino i le tasi.

Peitai, o le tagata lava ia e amiotonu ma faamaoni i le silafaga a le Atua, e tumau pea i lona faamaoni tusa lava pe itiiti ana mea e maua ae o le faamaoni ma le amiotonu e fiafia i ai le Atua.

**GALUEGA FAATINO:** Taliga Fesili

1. Aisea e taua ai le faamaoni?  
Tali: Aua a faamaoni le tagata i nai mea iti e faamaoni foi i mea e tele e tofia ai o ia, ma viia ai le Atua.
2. Afai e le faamaoni se tasi i mea a le tagata ese o le a le tau na te maua?  
Tali: E le mafai ona tuuina atu ia te ia ana lava mea
3. Aisea e le lelei ai le auauna i Alii e toalua?

Tali: Aua e fiafia o ia i le tasi ae inoino i le isi

pe a o tatou lē mautonu i taimi tatou te lei mafaufauina

4. O ai alii ia e toalua o loo taua e Iesu?

Tali: O le Atua ma le oa poo tupe.

**PESE:** 355 (Pese ma Viiga) Fiafia outou auauna a le Alii.

**A’OA’OGA:**

1. Ia faamaoni i so o se mea e valaauina ai.
2. Ia fiafia i le amiotonu a le Atua.
3. Ia faamuamua le Atua a le o tupe

.....

**MANATU AUTU O IULAI : E TOFOTOFO OE E LE OLAGA**

E lasi ma anoanoa’i tofotofoga o loo feagai pea ma i tatou i aso uma o le olaga. O faosoosoga, e tutupu pea ma tauau ai ina a tatou pa’u’u atu ai i le agasala. Ae mafua ona tatou toilalo, ona ua vaivai lo tatou ola talitonu i le alofa o le Atua i taimi uma o lo tatou ola. E foliga ua faigofie ona tatou taliaina nei faosoosoga, ae faatuatuaana’i ai le finagalo alofa o le Atua ina ia tatou savavali ai.

**ASO SA: 7 IULAI 2019**

**MATAUPU: UA FEFEFE LE NUU I MEA UA TUTUPU**

**SINI:** Ia malamalamam tamaiti, o le fefe o le isi lea natura faaletagata. E oo mai ia i tatou

**TUSI FAITAU:** Esoto 20- 18-21

**FESOASOANI MO FAIAOGA:**

O le fefe tamaiti; o le isi lea natura faaletagata; e maua ai tatou i taimi faafuase’i; o taimi e maua ai tatou i le lē mautonu; o ni mea ua tatou manatu ane tatou te lē mafaia; poo ni a’afiaga o i tatou i ni mea e tutupu faafuase’i, ona o lo tatou faatamala, aemaise ai ua lē mautonu lo tatou ola faatuatua ma talitonu faamaoni i le Atua.

E eseese lava fa’aaliga o le fefe. O nisi, e iloa lelei i uiga fa’aalia. O nisi e leiloa ni ia uiga; aua e mata fiafia lava i soo se taimi. Ae mafai ona maitauina i ana faatinoga, ma lana tali atu i se mea o loo iai lona fefe tele.

I le tala lea sa tatou faitauina tamaiti, o le foi ane lea o Mose sa i le Mauga o Sinai e pei ona fetalai ane o le Alii ia te ia; ona faia lea e Mose e pei ona fetalai ane o le Alii, ma na faapotopoto le nuu uma.

Ona fetalai ane lea o le Alii ia Isaraelu, ma faailoa iai ana tulafono e pei ona tatou a’oa’oina. E eseese lava auala e momoli mai ai le finagalo o le Alii. O nisi taimi e momoli mai i se leo filemu. O nisi foi taimi, e fetalai mai ai le Alii i se auala e fa’aalia ai lona silisiliese, e pei la ona tatou iloa i le vaega sa faitauina. Fai mai ua iloa e le nuu uma le faititili ma le uila, ma le taalili o le pu, ma le mauga ua pusa, ona fefefe lea ma ua gatete lava, ma ua tutu mamao atu.

O le a le uiga o lea vaaiga mata’utia na iloa e Isaraelu? Ioe tamaiti, o le fa’aalia lea o le silisiliese ma le mata’utia o le Alii. O se auala e ta’u atu ai ia Isaraelu le silisiliese lea o le Atua, e lē taitai ona faatusalia i nisi atua. Tatou te iloa ma malamalama

lelei tamaiti, a leo tetele ma avaavau o tatou matua iai tatou ona o lo tatou lē usita'i ma faalogogatata; tatou te lagonaina lo tatou fefefe ma pala'aai. Peita'i o le auala ua momoli mai ai le finagalo o le Alii, ua talafeagai lelei ma lo latou lē faalogo ia Mose ma Arona.

E le o le finagalo o le Alii ina ia faafefe le tagata. Ao le fa'aalia o lona mata'utia ma lona silisiliese, ina ia iloa e Isaraelu uma, o le Atua moni lava Ia, ma e ao ona mulimuli e faia lona finagalo. O le finagalo foi lea o le Atua iai tatou tamaiti. Ia tatou mulimuli e faia lona finagalo ona o lona alofa, ae lē o le fefe tatou te mulimuli atu ai ia te ia. Fai mai 1 Ioane 4: 18 "E leai se fefe i le alofa, a'o le alofa atoatoa e faateaseina ai le fefe....."

E tupu lo tatou fefefe, ona ua tatou le mulimuli e fai le finagalo o le Atua, ao tatou lava loto.

**GALUEGA FAATINO:** Taliga Fesili

Taliga Fesili: Tali fesili e faatatau i le tala.

1. O fea na iloa ai e Isaraelu le vaaiga lea i le Atua?  
Tali: O le mauga o Sinai.
2. O fea sa iai le nuu uma?  
Tali: Sa tutu mamao atu i latou.
3. O le a se mea na oo ia Isaraelu ina ua fa'aali mai le Atua i le uila ma le faititili?  
Tali: Ua fefefe ma ua gatete.
4. Afai e fa'aali mai le Atua ia i tatou i se auala faapea, o le a se feau o loo momoli mai ai mo i tatou?  
Tali: O le Atua silisiliese ma le mata'utia; e ao ona tatou mulimuli ma faia lona finagalo.

**PESE:** Pese: 'O le Atua e mata'utia'

**A'OA'OGA:**

1. Aua le fefe vavale i mea o le foafoaga paia a le Alii.
2. E lē o le fefe tatou te mulimuli ai i le Atua, a o le tatou alolofa ia te Ia.
3. E leai se fefe i le alofa, ao le alofa atoatoa e faateaseina ai le fefe.

.....

**ASO SA: 14 IULAI 2019**

**MATAUPU: FAAETEETE I AGAGA LEAGA**

**SINI:** Ia malamalama tamaiti, soo se mea lava o iai le Agaga o le Atua, o loo iai foi ma le agaga leaga e taumafai e faasese lo tatou ola taumafai mo le Atua ma lona finagalo.

**TUSI FAITAU:** 1 Ioane 4: 1-6

**FESOASOANI MO FAIAOGA:**

E le o se mea fou le tau faasese ma le tau faaleaga tamaiti. E le o se mea foi na faatoa tupu i o tatou vaiata, poo se mea foi e oso faavaitaimi. O le isi lea natura e taatele ia i latou e lē fiafia i le Atua. E iloa gofie i o latou uiga, ma a latou amioga faatino i lea aso ma lea aso. E malū a latou fa'aupuga ma fa'aaloalo o latou uiga, e faigofie ona tosina ane iai loto o tagata faigofie. Tagata tonu ia tamaiti, lea e fai mai Ioane i le vaega o lana tusi lea sa tatou faitauina, ".....ia outou tofotofa i agaga pe mai le

Atua i latou; auā e toatele perofeta pepelo ua o atu i le lalolagi.”  
 O Ioane tamaiti, o le soo lea o Iesu e ta’u o le so’o alofaina. Pau lea o le soo sa taoto i le fatafata o Iesu. O lona uiga, o loo ia te ia le moni atoatoa o le alofa o le Alii Faaola. O le ala lea o lona molimau mai, ma faailoa lona iloa i le auala tatou te iloa tino ai lea alofa.

O le manatu la o Ioane tamaiti, ia avea i tatou ma tagata e molimauina lea alofa; Ae aua nei pei i tatou o tagata ua faaigoaina o ‘anetikeriso’, O tagata nei o loo latou faia a’oa’oga sese e uiga i le Alii o Iesu. O latou talitonuga tamaiti, e afua mai i le vaitau o le afio mai o le Mesia sa valoia. Sa manatu tagata i lena vaitau, o le Mesia o le a sau, o se tagata maolsi, e tietie i se solofanua ma lana pelu ma lana talitā e tau ma faaumatia malo malolosi. E matuā lē talitonu lava o Iesu o le Mesia. Latou te lē taliaina, o Iesu o le Alo o le Atua. O le ala lea o le ō mai o nei tagata faafoliga mai o ni perofeta o latou uiga, ma a latou amioga e tata’i ese le talitonuga o tagata ua talitonu faamaoni, o Iesu o le liutino tagata o le Atua; o le Alo lava o le Atua na afio mai e faaola le tagata agasala.

O le feteenaiga la o manatu ma talitonuga nei e lua tamaiti, lea na mafua ai ona aumai e Ioane lenei lapataiga. E le gata i le au Kerisiano i na ona po, ae faapea foi tatou. Ia tatou faaeteete i agaga leaga. E leai lava se eseese ma talaiga tau faasesē; e pei ona iai le tele o le mau talaiga i nei ona po, lea ua tele ina aga’i iai le toatele o talavou, ma fai mai o latou ua faaolaina. O ituaiga agaga ia, e aulelei ma matagofie a latou faiga e faatosina ai le vaai. E malū ma suamalie a latou upu, e faigofie ai ona seetia ma gaua’i le loto o le tagata faatuatua, ma talitonu i le Agaga o le Atua.

Tamaiti, aua nei seetia i tatou i agaga ia. A ia tumau lo tatou talitonu ia Iesu Keriso e pei ona a’oa’oina ai i tatou. Ia mausali lo tatou talinonuga, ma faailoa atu o tatou o isi tagata ua talitonu faamaoni i le faaolataga a Iesu Keriso, ona lē maua lea o i tatou i

le vaivaiga lea o le ola femoumoua’i. Ao le faatalitali ma le onosa’i i le Alii, e maua e ia le ola e faavavau.

### **GALUEGA FAATINO:** Taliga Fesili

Tali Fesili o loo faatatau i le tala:

1. O ai Ioane?  
 Tali: O le so’o o Iesu/ O le uso o Iakopo.
2. O le a le tauga o Ioane e tusa ma so’o o Iesu?  
 Tali: O le so’o alofaina.
3. O ai tagata ia e fautuaina ai i tatou e tataua ona faaeteete iai?  
 Tali: O perofeta pepelo/ Anitekeriso.
4. E mafua i se a ona eseese talitonuga o tagata i lena vaitau ia Iesu?  
 Tali: E eseese le faauigaina e tagata o le itu tagata o Iesu, ma le auala na la afio mai ai.
5. E faapefea ona tatou iloa le Agaga lelei ma le agaga leaga?  
 Tali: E iloa ia latou ta’utinoga. (Ua maliu mai Iesu i le tino mai le Atua.)

### **PESE:** ‘A tumau ia Iesu’

#### **A’OA’OGA:**

1. Ia tumau ia Iesu lo tatou ola talitonu
2. E faamalosiā e i tatou lo tatou lava ola faatuatua.
3. E le maua se manuia i le ola femoumoua’i.

.....

**ASO SA: 21 IULAI 2019**

**MATAUPU: UA FAAMANUIA LE ATUA IA APERAAMO**

**SINI:** Ia malamalama tamaiti i le mafuaaga e ala ai ona faamanuia le Atua i se tagata.

**TUSI FAITAU:** Kenese 22: 15- 19

### **FESOASOANI MO FAIAOGA:**

Fai mai nisi o upu o le papatisoga o le fanau tamaiti; “Ia faamanuia atu le Alii ia te oe, ma tausii ia te oe.....” E mafua lea tamaiti, ona o le Alii o Iesu ma lana galuega sa faia i tamaiti, ina ua vavao e ona soo lo latou oo ane ia Iesu. Fai mai ua siitia e Iesu i latou i ona vae; ua faaee foi ona aao i luga ia te i latou ma faamanuia iai.

O faatinoga ia a le alii o Iesu, o loo matuā manino mai ai lona naunautauga, ia ola manuia uma tamaiti. O le ute lea o le tausinioga o loo tatou ola ai nei; Ia manuia mea uma tatou te faia. Peita’i, ua toatele nisi o fanau ua pa’u’u’u atu i le agasala ona o faaososoga e lei mafaufauina. E lei mausalī le ola talitonu i le Atua. E mafua mai i siosiomaga o loo ola ma nonofo ai, O nisi foi e mafua ona o le tosina gofie i faaososoga, ona e lei lelei ona tapu’e le faamanuia lea ao laiti.

O le tala lea sa faitauina tamaiti, o le tala ua masani ai tatou. O le faatonuga a le Atua ia Aperaaamo, e ave lona atalii pele e toatasi e fai ai le taulaga mu i le Alii le Atua. E lei faalotolotolu Aperaaamo i le ave ma le lē ave o Isaako e fai ai le taulaga. Fai mai le tala, na ala tula’i o ia i le taeao, ma tapena mea uma mo lea faamoemoe. E lē o taua se lē fiafia pe faanoanoa foi o Aperaaamo ona o lona atalii pele e toatasi, ao lana faatinoga ma

ana tali atu e tusa ma fesili a lona atalii, ua iloa ai le fai mea fiafia, ma le ituaiaga tagata e iai Aperaaamo.

O le ala lea o le tau o Aperaaamo o le tamā o le au faatuatua E lei masalosalo Aperaaamo i le finagalo o le Atua. O le mafuaaga lea o le toe valaau ifo o le agelu e faailoa ia Aperaaamo le tautoga a le Atua, aua o lona usita’i ma lona faatuatua i le Atua, na ia lē tuua ai lona atalii e toatasi e osi ai le taulaga i le Atua.

E le faigofie le usita’i tamaiti; ae ese foi le taugatā pea maea ona e faatinoa. O le usita’i, e mafai i le malosi o le tatou ola faatuatua ma talitonu i le Atua; ona tatou savavali tonu lea e faia lona finagalo ae lē o tatou loto. Vaai la i le faamanuiaga na maua e Aperaaamo. O le fuaiupu e 17, e faalua ona fa’aaogaina le upu ‘matuā’, “..... ou te matuā faamanuia ia te oe, ma ou matuā faatoateleina lau fanau e pei o fetu o le lagi, e pei o le oneone foi i le matafaga....”, ma isi faamanuiaga o loo mulimuli mai e manuia ai atunuu uma o le lalolagi.

E le o se tama’i manuia la na maua e Aperaaamo; O manuia e lē mafaitaulia, ao manuia foi e augatupulaga, lea foi e manuia ai ma tatou. E faigatā ona tatou iloa ia manuia, tatou te le maua foi, pe a tatou le usita’i e pei o Aperaaamo. O le tatou usita’i i matua, o le faifeau, o tamā ma tinā matutua o le au lotu, o tatou faiaoga ma isi tagata e matutua atu ia tatou, o le tatou usita’i lava lea i le Atua; Aua o latou ia e ala mai ai faamanuiaga mai le Atua, pea tatou savavali ma faia lona finagalo e ala i ana tulafono. Ia manuia tele lenei Aso Sa.

### **GALUEGA FAATINO:** Faatinoga

E sili atu ona malamalama tamaiti i le tala lea, pea faatino a e latou lava.

Vaelua le vasega, ona fai lea o faatinoga a vaega uma e lua, poo ai le vaega e manaia ma lelei le latou faatinoga.

**PESE:** Aperaamo le Tamā, ma lana fanau....

**A’OA’OGA:**

1. Ola faatuatua i le Atua o le puna lea o manuia.
2. O le ola usita’i e maua ai faamanuiaga.
3. Aua le fia tofotofa i le finagalo o le Atua.

.....

**ASO SA:** 28 IULAI 2019

**MATAUPU:** E TOFOTOFOINA O TATOU LOTO

**SINI:** Ia malamalama tamaiti e i ai tofotofoga ia i tatou i taimi ma aso uma o lo tatou ola. E tele ina afaina ai o tatou tagata pea sese a tatou faaiuga fai.

**TUSI FAITAU:** 1 Tesalonia 2: 1-4

**FESOASOANI MO FAIAOGA:**

O le malaga lona lua faamisionare a le Aposetolo o Paulo, na oo ai i le aai lea o Tesalonia. Sa fai ma taulaga o Maketonia, ae pulea e ona lava tagata; o le ala lea e taua ai Maketonia, o le taulaga o sa’olotoga.

Na afea e Paulo i lana malaga lea, ma iloa ai le sunako o tagata Iutaia. Na ulufale i laua ma Sila, ma felafolafoa’i ai ma i latou e uiga i le ‘Keriso’. Fai mai le tala tamaiti, e toatele nisi na liliuina i lea malaga. A’o le au fouvale ma le lē talitonu, ua latou faatupu le vevesi ma taumafai e molia nisi o le au uso i faipule o le nuu, ina ua latou le maua Paulo ma Sila. Fai mai i latou, o

tagata faatupu faalavelave ma le fouvale i le lalolagi uma. Ua latou faatuiese i poloaiga a Kaisara, ma ua fai mai o Iesu o le tasi foi lea tupu. O le po o le aso lea tamaiti, na o ane ai le au uso ma faasosola ia Paulo ma Sila i le tasi nuu, ina ia saogalemu ai i laua.

Fai mai ua faasolo le malaga ma ua taunuu i Korinito. O le oo ane o Timoteo ma le tala fiafia ia Tesalonia, na ala ai loa ona tusia lana tusi muamua lea, e faamalosi au i le ola faatuatua o le Ekalesia i Tesalonia.

Fai mai Paulo, e lei faaleaogāina lo latou iai ia i latou; aua e toatele nisi na liliuina i lea aso. E ui lava ina sa faatigaina i latou i Filipi, ae lei faavaivai ai ona finafinau, ma tautala i le tala lelei a le Atua.

O le tusi la a Paulo ia Tesalonia; e apoapoai ai ma faamanatu i e ua talitonu ia Iesu Keriso; E le o se faa’ole’ole poo se mea leaga ua latou faia, ae ona o le finagalo o le Atua na tuu i o latou loto, e tatau ai ona latou a’oa’o atu ai le Tala Lelei O le manatu o le Aposetolo, “e lē ina ia outou fiafia mai ai, ao le Atua; aua o Ia na te tofotofa i o latou loto”.

O le uiga o le manatu o le Aposetolo tamaiti, e le na o le tiapolo e tofotofoina i tatou; e pei ona faasoosoina ai le Alii o Iesu e Satani i le 40 aso i le vaomatua. E mafai foi ona tofotofoina i tatou e le Atua i se mea o ia finagalo iai, tatou te faia mo Ia. O nei tofotofoga uma, e tuu faitalia i le loto o le tagata pe fai pe leai. E pei foi o le tala sa faitauina ia Paulo i Tesalonia. O loo taua e Paulo le faaleagaina o i latou i Filipi. O tofotofoga foi na a le tiapolo iā Paulo, e aua le faia le finagalo o le Atua. Fai mai e lei avea ia sauaga na vaivai ai le Aposetolo i le faia o le finagalo o le Atua.

Tamaiti, e iai taimi e tofotofa ai tatou e fai se mea lelei. O lona uiga, o le finagalo lena o le Atua ia tatou faia. E iai foi taimi e tofotofa ai tatou e le tiapolo, e afua ai ona faia o mea sesē. E tatau ai ona mata’itu lelei tofotofoga ia, ina ia mafai ona tatou



alo ese ai. O mea lelei tatou te mafai ona fai, o le finagalo lena o le Atua ia i tatou. O lona uiga, na tofotofoina i tatou e le Atua, pe tatou te usita'i e fai lona finagalo, pe leai. E tatau la ona tatou usita'i e fai le finagalo o le Atua, ona faamanuia mai ai lea o Ia ia i tatou.

**GALUEGA FAATINO: Paso**

Fa'aaoga le paso e saili ai upu o loo i le lisi:  
(faaleaoga, faaleaga, finafinau, apoapoi, faaoleole, tofotofo.

a	e	i	u	f	g	m	n	p	s
u	a	g	o	a	e	l	a	a	f
a	t	v	h	k	r	e	a	i	a
n	m	n	p	s	t	g	v	h	a
i	k	r	s	t	a	l	m	n	o
f	g	l	t	e	i	o	u	f	l
a	t	s	l	p	n	m	f	g	e
n	m	a	e	v	a	n	g	l	o
i	a	p	o	a	p	o	a	i	l
f	t	o	f	o	t	o	f	o	e

**PESE:** Le alofa o le Atua e ofoofogia

**A'OA'OGA:**

1. O tagata maumalo, le tagata e faia le finagalo o le Atua
2. E tofotofoina i tatou e le Atua i ona manuia.
3. E aulelei tofotofoa a Satani, ae iu i le malaia.

.....

**MANATU AUTU O AOKUSO:  
SE A SE MEA E TE MANA'O AI MAI LE ALII?**

E tofu lava le tagata ia ma ona manaoga e tuuina atu i le Atua. O le tupu o Solomona na ole atu i le Atua e foa'i mai le atamai na te faafoea ai le nuu o Israelu, ina ua mavae atu lona tamā o Tavita. O le toe mana'o o Samasoni i le Atua; ia toe au mai sona malosi e tau masui atu ai ia Filisitia. O le mea ia mautinoa e tatou, so o se manaoga tatou te ole atu ai i le Atua; e tali mai lava o Ia. E iai foi o tatou mana'o e le tusa ma lona finagalo; ae talia lava ina ia a'oa'oina ai lo tatou vaivai.

**ASO SA: 4 AOKUSO 2019**

**MATAUPU: UA MANANA'O ISRAELU I SO LATOU TUPU**

**SINI:** Ia malamalama tamaiti i le mafuaga o le mana'o o Israelu i se tupu. O se manaoga na lei faigofie i le Atua; ae na talia lava, ina ia a'oa'oina ai lo latou vaivai.

**TUSI FAITAU: 1 Samuelu 8: 1-9**

**FESOASOANI MO FAIAOGA:**

O Israelu tamaiti, na filifilia e le Atua e fai ma ona nuu; e faailoa lona finagalo i le lalolagi. O lona uiga, e tatau ona fai mea faalogo i le Atua. E tatau ona usita'i ma faia mea uma e tusa ma lona finagalo.

Ao le uiga lava lea o le tagata, e pei foi o tatou. E iai loa se faaletonu, ona tula'i mai loa lea o ni lagona e ta'ita'i sese ina ai le mafaufau o le tagata. E pei o le tala sa faitauina; Ua oo ina matua Samuelu, ua ia manatu foi e savavali lana fanau i ona ala. Ona ia tofofi lea o i laua e fai ma faamasino i Peresepa, poo le itu i Saute o Isaraelu.

O le mea ua tupu tamaiti, ua faasesē e Ioelu ma Avia le mafaufau lelei o Samuelu. Ua la le savavali i ala o le laua tamā. Ua avea le tofiga maualuga ma ala ua saili ai lo laua tamaoiga i oloa ma meaalofoa mai i tagata. Ua faapi'opi'o foi ona fai a laua faamasinoga.

O uiga ia o le fanau a Samuelu na manatu ai le nuu, ua tatau ona faia se tupu e fai ma faamasino i tagata uma. Na o latou iloa foi i nuu na ui mai ai le faigamalaga e aga'i atu i Kanana; e leai lava se nuu e leai so latou tupu.

O le ala lea o le faapotopoto o toeiina ma o atu ia Samuelu i Rama, ma faaoo atu iai lo latou fanoga, ina ia faia se tupu e faamasino i le nuu, aemaise i le taimi o taua ma isi malo. E lei avea mafuaaga na taua e toeiina e talia lelei ai le savali. Fai mai le tala tamaiti sa faitauina; "...ua leaga ia Samuelu le upu sa fai mai ai le nuu." Ona tatalo ai lea o Samuelu e ta'u atu i le Atua lea mana'o lē lelei o le nuu.

E lei te'ena e le Atua le mana'o o le nuu. Ua fetalai ane le Atua ia Samuelu, e usita'i i le mea ua fai mai ai le nuu. E ui lava o le mana'o o le nuu na faatoai ia Samuelu; ao le mea ua mautinoa e tusa ma le finagalo o le Atua; ua te'ena e Isaraelu le Atua. Ua latou lafoa'iina le Atua, o le Tupu o tupu, o le faamasino sili. Ua avea faafitauli i lo latou siosiomaga, ma le vaai faaletagata i isi nuu tuaoi; ua galo ai galuega mamana na fai e le Atua; i le aveina a'e o i latou mai Aikupito, e agai atu i Kanana.

Na talia e le Atua le mana'o o Isaraelu. A'o lei tofia la se tupu mo Isaraelu; Na muamua faatonuina e le Atua Samuelu, ina ia

faailoa ia Isaraelu amioga a le tupu. O le a pule ia i latou. Pe a fa'aauau le tala tamaiti; o ina na amata ai ona fai tupu o Isaraelu. Ua a'oa'o mai lenei tala mo i tatou; e talia e le Atua soo se mea tatou te ole atu ai. E talia foi mana'oga faalelelei, e pei o le mana'o lea o Isaraelu. O mana'oga e auala mai ai se lesona ona o lo tatou vaivai ma le faatauva'a. E lē talia e le Atua se manaoga lē tatau; ae na o manaoga ua silafia e le Atua o loo avatu faatasi ma loto o tagata, ona ua fia maua se fesoasoani; ma manaoga e ala mai ai se a'oaiga i le tagata loto ma'a'a ma le lē ava i le Atua.

O le a se mea o tatou mananao ai i le Atua? Ioe, tatou te mananao i le potu mai le Atua, ma ona manuia faasoa mai mo i tatou.... Ae faafefea ona talia e le Atua ia mana'oga? E talia pe a tatou toa'aga e tatalo ma le faatauanau, faatasi ma le silasila mai o le Atua o tatou taumafai e galulue, ona faamanuia mai lea o Ia ia i tatou.

### **GALUEGA FAATINO:**

Fa'aaoga upu o loo i le lisi e faatumu ai avanoa o loo i fuaiupu ta'itasi.

(faamasino, ulumatua, faapiopio, tofia, lafoaina, amioga.)

- 1 O le igoa o le atalii ..... o Samuelu o Ioelu.
- 2 O le mana'o o le nuu ia Samuelu, ina ia ..... se tupu e faamasino i le nuu.
- 3 Na tofia e Samuelu ona atalii e fai ma ..... i le nuu
- 4 E le o oe ua agaleaga iai le nuu, ao a'u ua latou .....  
.....
- 5 Ua talia e Ioelu ma Avia mea alofa i se auala ..... mai i tagata.

6. O le finagalo o le Atua ia faailoa i le tagata le ..... a le tupu ia i latou.

**PESE:** Le tupu silisili (Tusi Pese)

**A’OA’OGA:**

1. O le tatalo faatauana, o le faailoga o mana’o e tali leleia e le Atua.
2. E talia e le Atua mana’o o le loto faamaoni o le tagata ia te Ia.
3. O mea tatou te maua, o le tali mai lea a le Atua.

.....

**ASO SA:** 11 AOKUSO 2019

**MATAUPU:** (ASO SA O TAMĀ)  
**O LE TAMĀ LOTO FAAMAGALO**

**SINI:** Ia malamalama tamaiti i aga ma matafaioi, a le tagata loto faamagalo.

**TUSI FAITAU:** Luka 15: 11-24

**FESOASOANI MO FAIAOGA:**

O le upu faamagalo tamaiti, o le matafaioi lava lea a le Atua. Aua na o Ia e mafai ona magalo ai le tagata agasala. Peita’i, o le matafaioi a le tagata, e pei ona taumafai le tala sa faitauina e faailoa mai; o le faatino o le finagalo o le Alii o Iesu Keriso. Fai mai o Ia; “... aua le tau ai le leaga i le leaga; a ia tau ai le leaga i le lelei.”

O le faatinoga la o le finagalo lea o Iesu tamaiti, e oo foi ia tatou, tatou te lē mafaia. I le tala sa faitauina, e mafai ona tatou faapea, o le tamā e mauoa, e tele ana mea. Ai o le ala lea ua faigofie ai ona tu’u atu lea vaega oa e fai ai le ivi o lona atalii. Aua fai mai le tala; ua mana’o le ui’i i lona ‘tofi’, o loo faatatau i lana vaega oa mai oa, poo tupe e tele a lona tamā. Ua tago ane nei le tamā ma avatu iai lana vaega oa, ona malaga ai lea o ia i se tasi nuu mamao e tafao ai.

Ua soona ulavale; o lona uiga, ua amio pa’a’a, ua soona fai lona olaga ma tafao faasoloatoa ona o le tele o ana tupe; ua leiloa fuafua lelei. O le mea ua tupu tamaiti, ua uma ana tupe. Ua leai foi se tasi e toe alofa ane iai, aua ua mativa.

Ona alu ane lea o ia ua nofo i le tasi tagata e fai lana lafu pua’a. Ua ave e lea tagata le tama na te vaaia ana pua’a. O le mea ua tupu tamaiti, ua aai faatasi lenei tamaititi ma pua’a, aua ua leai lava se tasi na te avane se meaai ma ia. Ua toe mafaufau lenei alii i le toatele o auauna, tele meaai e totoe i le fale o lona tamā, ao lea ua aai faatasi ma pua’a; Fai mai, “..ona atamai ai lea o ia”. Ua tulai ma toe foi i lona tamā. Fai mai ua iloa mamao atu e lona tamā le savalivali atu a lona atalii, ona mutimuti vale lea o lona alofa, ua momoe atu ma fusi ma sogi atu ia te ia.

E fia ni tamā faapea tamaiti ua tatou iloa? Ae a o tatou tamā? Ioe! E iai lava isi tamā faapena. Ao se ata lelei lea na faia e lenei tamā i lona atalii. Ua ia lē tuli esea pe sasa foi ia te ia. Ae fai mai.... “Ua momo’e atu, ua fusi ia te ia, ma sogi atu ia te ia.” O le faatinoga a le tagata e usita’i i le finagalo o le Alii o Iesu; Aua o le matafaioi lea a le tagata, o le faia o le finagalo o le Alii. E lei popole le tamā i ni mea ua alu, ona o le fia iloa ma le fia ta’a o lona atalii. Ao le fiafiaga sili i lona loto, o le vaai atu ua toe foi mai o ola. E toe fau ma soloi mea ua toesea, ao le ola e lē toe maua.

Vaai la tatou tamaiti i le fiafia tele o lenei tamā. Fai mai ua fasi le tama’i povi peti ma fai ai le aiga fiafia. Fai mai o ia; “o lona

atalii na oti ua toe ola, na leiloa foi a ua toe maua”. Ae le gata i lea, a ua faaofu ia te ia i le ofu tatapuvae, o le mama i lona lima ma ua faase’e foi ona vae i se’e vae.

O le matafaioi lena a le tagata loto faamagalo. Na te tau ai le leaga i le lelei. Aua e faateleina ai lona manuia mai le Atua; Ao le a a’oa’oina ai le faatauvaa o le tagata, ma ia lagonaina ai le loto salamō i luma o le Atua. O le a fulitua i le leaga, ae o le a matuā faasaga atu e faia le finagalo o le Atua. A o le loto faamagalo o le tagata; O le faia lea o le finagalo o le Alii o Iesu; Ona faamagalo mai lea o le Alii i le tagata agasala, ae faamanuia mai i le tagata loto faamagalo. Ia manuia tele outou le fanau.....

### **GALUEGA FAATINO: Faatinoga**

Tofi e oe le faiaoga ni tamaiti latou te faatinoina le tala. E manaia foi ae fai ni vaega se lua; ona fai faatauvaga lea poo ai le vaega e sili ona lelei le latou faatinoga.

**PESE:** Jesus loves me this I know

### **A’OA’OGA:**

1. E finagalo Iesu e tau ai le leaga i le lelei.
2. O le loto faamagalo o le mea mai le Atua.
3. Ia e alofa atu i le lua te tuaoi e pei o oe lava ia te oe.

.....

**ASO SA: 18 AOKUSO 2019**

**MATAUPU: UA TALI LE ATUA IA PALA’AMO**

**SINI:** Ia a’oa’o tamaiti ia malamalama, soo se mea lava tatou te ole atu ai i le Atua; e tali mai lava o Ia e tusa o lona finagalo, .

**TUSI FAITAU:** Numera 22: 2- 14

### **FESOASOANI MO FAIAOGA:**

E malamalama le tala lea tamaiti, i se vaega o le tala faasolopito o le malaga mai o Isaraelu mai Aikupito, e agai atu i Kanana le nuu folafolaina. O le ō ese mai o Isaraelu e ō i Kanana; Na talosaga ai Mose ia Sekono le tupu o sã Amorī, pe mafai ona oso atu le latou malaga i ona laueleele, ma agai atu ai i Kanana. Peita’i, na teena e Sekono ma ona tagata le mana’o o Isaraelu. Fai mai ua ō ane ana tagata tau i se tasi aai itiiti e igoa ia Iaesa ma ua fai ai le taua ma Isaraelu. O le mea ua tupu, ua fasia faatasi Sekono ma ana au tau e Isaraelu.

Na faalogo Oko le tupu o Vasana i le mea ua faia e Isaraelu ia Sekono, ona saunia foi lea o lana au tau e tete’e atu ai ia Isaraelu. Fai mai tamaiti, na faapena foi ona fasia e Isaraelu e pei ona faia ia Sekono. Na avea le to’ilalo o ia tupu malolosi, ma mea na matuā fefe ai Palako le tupu o Moapi. Ona ia aami lea i alii sili ma le tupu o Mitiana, ma latou fai tonu faatasi pe se a se mea latou te faia ia Isaraelu. Aua ua manatu Palako, o le mea foi lea o le a faia e Isaraelu iai latou. Na tonu o le a aami Palaamo le atalii o Peoro, na te fetuaina le fanauga a Isaraelu, ia matuā malaia i latou ma tulia gofie ai. Fai mai o toeaiina o Moapi ma toeaiina o Mitiana na o e ave le feau, faatasi ai ma mea e totogi ai Palaamo. Ua oo atu i latou na ave le savali, ma ua talatala uma iai le ma’ema’eā o le fanauga a Isaraelu na faia i o latou nuu tua’oi. Ona fai ane lea o Palaamo, sei o latou momoe, ae sei fesili i le Alii e maua ai se tali mo le latou savali i le aso a taeao. Manatua tamaiti, e moi o Mose le ta’ita’i malaga o Isaraelu i lea

taimi, ao le Alii lava le ta'ita'i au sili o le nuu. O le ala lea o le afio ifo o le Alii i le po ia Palaamo, ma fesili poo ai ia tagata o loo ia te ia? Na ta'u atu e Palaamo i le Alii le mana'o o Palako le tupu o Moapi, le mea e ao ona faia i le fanauga a Isaraelu. Peita'i, o le tali ane a le Atua tamaiti; o le tali o loo faatumauina ai lana feagaiga ma lona nuu filifilia. Fai mai a Ia; "Aua tou te o ma i latou; aua foi e te fetuu i le nuu; aua ua faamanuia i latou."

O le tali a le Alii ia Palaamo tamaiti; e mafai ona tatou iloa ai; o le Atua osi feagaiga. Na te tausia lana feagaiga ua uma ona fai ma tamā o lona nuu. O le Atua o manuia. O lana faamanuia na faia ia Aperamo, Isaako ma Iakopo; e faavavau lea, e augatupulagā. O le Atua o le ta'ita'i au sili. O lana ta'ita'iga lea mai Aikupito, na mafai ai ona o ese mai le nuu; Na mafai ai foi ona faatoilaloina o nuu na sii taua ane i le fanauga a Isaraelu, e pei o sa Amori ma Vasana. O lona uiga, e tumau lona alofa ia Isaraelu. E le finagalo le Alii e fai e se tupu se mea leaga i lona nuu. E le finagalo foi le Alii e faamalaia e se tagata, poo se taulaitu lona nuu filifilia.

E mafai foi ona tatou iloa ai i le tali lea a le Atua tamaiti, e faapena foi le tali mai o le Atua ia i tatou e tusa ma lona finagalo. E le tali mai o Ia i se mea e leaga ai tatou, ae tali mai ina ia tatou faia lona finagalo e manuia ai tatou. O lana tali mai ina ua agasala le lalolagi, na Ia lē tuuna ai Iesu lona atalii e toatasi; ina ia toe fanau fouina le tagata agasala, ma maua ai le mafutaga vavalalata a i tatou ma Ia e faavavau.....

**GALUEGA FAATINO:** Taliga Fesili.

Tali Fesili o loo faatatau i le tala.

- 1. O ai Palako?
- Tali: O le atalii o Seporu/ O le tupu Moapi.

- 2. O ai Palaamo?
- Tali: O le atalii o Peoro/ O le perofeta
- 3. O ai Mitiana?
- Tali: O le nuu
- 4. O le a le mana'o o Palako ia Palaamo?
- Tali: Ia fetuuina Isaraelu ia faigofie ai ona taatoilaloina.
- 5. O ai na fesoasoani ia Palaamo mo se tali e tuuina atu ia Palako?
- Tali: O le Atua.
- 6. O le a le tali a le Atua ia Palaamo?
- Tali: "..... aua tou te o ma i latou, aua foi e te fetuu i le nuu, auā ua faamanuia i latou."

**PESE:** E lelei mea uma ua ia Iesu

**A'OA'OGA:**

- 1. E tali mai le Atua ia i tatou i so o se taimi.
- 2. E lē talia e le Atua manaoga tau faaleaga.
- 3. E finagalo le Atua tatou te savavali i ona ala.

.....

**ASO SA:** 25 AOKUSO 2019

**MATAUPU:** UA FAAMAMA E IESU LE LEPELA

**SINI:** Ia malamalama tamaiti i le auala ma le faatinoga a le tagata lepelele na fai ia Iesu;

na finagalo ai le Alii e faamalōlō i lona mai.

**TUSI FAITAU:** Mataio 8: 1- 4

### FESOASOANI MO FAIAOGA:

Ua uma le lauga umi a le Alii i luga o le mauga, sa Ia a’oa’o ai tagata i mataupu tau i le malo o lona Tamā i le lalolagi. Fai mai o le a’oa’oga lea a Iesu, na molimauina ai e tagata le eseesega o Iesu ma le au tusiupu. Aua ua ia a’oa’o ia te i latou e pei o se ua iai le pule, ae le pei o se tusiupu.

Fai mai Mataio; “...ua maliu ifo o Ia i le mauga, ona mulimuli mai ai lea ia te Ia o le motu o tagata e toatele.” O nei tagata e toatele, o loo iai faatasi ma tagata mama’i, lea e iai faatasi ma le tagata lepela. O le ‘lepela’; o se faama’i e pipisi e leai sona fofo. A maua ai se tagata, ona faanofo esea lea mai le lio o tagata malolosi poo tagata ola; aua fai mai o le tagata lepela, o le tagata ua oti, ua leai se faamoemoe ola oi ai. O le ala lea o le faia e Mose o le tulafono i le feagaiga tuai (Levitiko 14: 1- 4), mo le malu puipua lelei o tagata e le aafia i lea faama’i.

Peita’i o le a’oa’oga a le Alii na faalogo iai lenei tagata ma’i lepela, ua ia mautinoa ai, e mafai e Iesu ona faamalolo o ia. O lona talitonuga lea na faatino ina ua taunuu ane i luma o le Alii, ma ifo atu ia te Ia; ma ua faapea atu; “Le Alii e, a e finagalo iai e te mafaia lava ona faamama mai ia te au.” O le ifo tamaiti, o se faatinoga e te faia e ta’u atu ai lou fa’aaloalo i lē o loo e ifo iai. Pe faapea foi; o le fa’aalia o lou faatauvaai i se mea ua e fia maua ai se fesoasoani, i le o loo e ifo iai. O le faatinoga lea, faatasi ma ana upu na ia tautala atu ai ia Iesu. Na silafia ai e le Alii le mana’omia moni o lana faamalologa i lenei tagata. E lei popole la le Alii i sa ma aulape o le tulafono, e faasa ai ona pa’i atu se tagata malosii i se tagata lepela. Ua Ia pa’i atu ia te ia ma

ua fetalai atu; “Ou te loto iai, ia mamā oe.” Fai mai o le taimi lava lea na tea ai le lepela o lea tagata.

Na faatonuina e Iesu lea tagata ina ia aua nei ta’u atu i nisi tagata lenei mea ua faia e Ia ia te ia, ae tau o le ositaulaga e alu atu iai ma avatu iai taulaga e pei ona iai le tulafono na poloaina e Mose, e faamaonia ai ua mamā lona ma’i lepela. Peita’i, o mea uma e faia e le Alii o Iesu; e le tau faia ni taulaga e faamaonia ai. E faamaonia lava i le loto talitonu ma le faatuatua faamaoni o le tagata; O Iesu o le foma’i sili. Na te mafaia ona faamalolo mai uma; e oo lava i ma’i e lē mafai ona maua se fofo, leai ni foma’i faapitoa; Ua nao Iesu lava le tali. Ioe tamaiti; e le tali tualimaina e Iesu se mea tatou te ole atu ai ia te Ia; ina ua silasila mai o Ia i o tatou loto faatuatua ma talitonu faamaoni, o Ia lava o le foma’i sili, e pei ona faia i lenei tagata mai. O le ala foi lea e tatau ai ona tatou faia. Ia tatou lagonaina lo tatou faatauvaai; e ala i lo tatou tootutuli ma punonou o tatou ulu i ona luma, ona tali mai lea o Ia ma le fiafia.

**GALUEGA FAATINO: Paso.** Faatumu le paso i upu o loo i le lisi.

(mauga, lepela, finagalo, mafaia, faamama, taulaga, poloai.)

m	n	p	s	t	v	h	k	r	e
a	e	i	o	u	f	g	l	m	a
f	g	l	m	n	a	p	s	t	g
a	v	h	k	l	a	r	a	e	a
i	o	u	e	f	m	g	l	m	l
a	k	p	v	t	a	s	p	n	u
h	e	r	p	n	m	a	u	g	a
l	p	o	l	o	a	i	l	v	t
n	o	l	a	g	a	n	i	f	m
e	o	f	l	n	m	g	u	i	a

**PESE:** E toa sefulu lepela na ō.

**A’OA’OGA:**

1. O Iesu o le foma’i sili.
2. O Iesu le tali o mea uma.
3. O le faatuatua faamaoni e tali mai ai Iesu ma le fiafia.

.....

**MANATU AUTŪ O SETEMA MA OKETOPA:  
E LĒ MAFAI ONA E FAIA NA O OE**

O mataupu o nei masina e lua. O loo taumafai e faailoa le taua o le galue ma faalagolago i le faasinomaga a le Agaga Paia. O le taua lea o le ola a’oa’oina lelei; E pei ona faia e le alii o Iesu i ona so’o. O lana a’oa’o atu ma faatino ao vaavaai ona so’o ma le talitonu faamaoni ia Iesu, o le a mafai ai e i tatou ona faasoa atu i isi tagata.

.....

**ASO SA: 1 SETEMA 2019  
(ASO SA O LE TALA LELEI)**

**MATAUPU: IA FAI NUU UMA MA SO’O**

**SINI:** Ia malamalam tamaiti, o le fetalaiga a le Alii o Iesu Keriso, o loo taoto ai lona faamoemoe lelei, ina ia galulue mo lona finagalo, ae leo tatou loto.

**TUSI FAITAU:** Mataio 28: 16- 20

**FESOASOANI MO FAIAOGA:**

O le upu soo tamaiti; O le tagata ua mulimuli ma faia le finagalo o Iesu. E soo ia Iesu. E faapei o Iesu, ae le o ia o Iesu. O le ala lea tamaiti na filifilia ai e Iesu le toasefulu ma le toalua e mulimuli atu ia te Ia; e vaavaai ma maitau lelei ana faatinoga, o ana a’oa’oga ma fetalaiga tau i le ‘Malo o le Atua’, e a’oa’oina ai i latou mo le lumana’i. I le taimi lea ao mulimuli ma vaai i galuega a le Alii o Iesu, o le taimi lea na taua ai i latou o ‘so’o’. (discipleships) o Iesu

Ao galulue faatasi Iesu ma ona soo; Sa fai lava ma tofotofoina i latou e Iesu, ina ia mautinoa ua ia’i latou le ola faatuatua. O le tele la o nei tofotofoga tamaiti; na iloa ai e Iesu, le tei tele ma ofo ai o ona so’o. Sala la ina ofo ma tete’i le au so’o; aua o loo pogisa le au so’o i le Alii o Iesu; O Ia lava o le Alo o le Atua soifua; ua ia te Ia le pule uma lava i mea uma o le foafoaga, o temoni atoa ma tagata.

Peita’i, sa fai lava foi ma fa’aataata iai e le Alii o Iesu lona maliu ma lona toetu mai le oti ma le tuugamau. E le o le finagalo o Iesu ina ia faapopole i le au soo; ao le tala moni e ao ona latou iloa, e fai iai le filifiliga a le tagata lava ia, pe fia avea pea ma so’o, pe leai.

O le maea ai la o le toetu; ona ō atu ai lea o ona so’o i Kalilaia, i le mauga na poloa’i atu ai Iesu ia te i latou. O iina na toe feiloa’i ai ma lo latou matai. O se feiloaiga tamaiti na lē mautonu ai le au so’o; ona o le toetu manumalo mai o le Alii o Iesu i le tuugamau. E ui lava o lea sa fetalai manino le Alii i mea ia, ao se vaaiga na matuā ofo ai i latou uma sa iai.

Ua latou ō atu ma ifo atu ia te Ia, ae o loo masalosalo lava nisi. O le ala lea o le fetalai tuusao o le Alii i ona so’o; aua o le faatinoga o lana galuega ao vaavaai i latou, na maitauina ai o loo

ia Iesu le pule i mea uma. Le ala lea o le ta’u atu e le Alii o lana pule. Ua fetalai o ia; “Ua tuuina mai ia te au le pule uma lava i le lagi ma le lalolagi. O lenei, ia outou o atu ma fai nuu uma lava ma so’o, ma papatiso atu ia te i latou i le suafa o le Tamā, ma le Atalii, ma le Agaga Paia; ia outou a’oa’o atu ia te i latou ia tausi i mea uma ua ou fai atu ai ia te outou, faauta foi, ou te ia te outou i aso uma lava, e oo lava i le gataaga o le lalolagi.”

Ua faailoa e Iesu lana pule. O le pule o le lagi ma le lalolagi. O lona uiga, o le pule e silisiliese, o le pule faale-Atua e le tutusa ma le pule a se tagata. O le pule ua fa’aalia ai o le alo lava o le Atua. Le pule lea ua ia tuuina atu i le au so’o, e o atu ai ina ia fai nuu uma ma so’o. Ua mafua ona saunoa faapea Iesu tamaiti, ona o le a le toe iai faatasi o Ia ma ona so’o i le faatinoina o le galuega. O lea ua oo i le taimi e tuua ai nao i latou ae foi atu o Ia i lona Tamā. Peita’i, ua ia i latou le pule lea mai le alii o Iesu, latou fai ai le galuega e pei ona a’oa’oina ai e Iesu. O le fetalaiga la a Iesu tamaiti, o lea ua iai le pule e fai ai le galuega e pei ona faia e Iesu. O lona uiga, e le gata ina latou papatisoina tagata i le suafa o le Tamā, le Atalii ma le Agaga Paia, a ia a’oa’o tagata i mea tau i le ‘Malo o le Alii i le lalolagi’, ma mea uma tau i le faaolataga a Iesu. Ua ia’i latou foi le malosi e faamalolo ai ma’i ma tulia temoni.

E ui lava la o le a lē toe iai faatasi ma Iesu i le galuega; ae o loo manino le fetalaiga a Iesu; “.....ou te ia te outou i aso uma lava, e oo lava i le gataaga o le lalolagi.” Ioe, o le a lē toe vaai i le tino, ao lona agaga e iai faatasi ma le tagata, e fesoasoani i lona vaivai. O le Agaga foi lea ua mafua ai ona tatou taliaina le faaolataga a Iesu Keriso, ua mafai ai ona avea i tatou ma ona so’o. O le tatou foi lea galuega faasoo e pei ona fetalai ai Iesu i ona so’o; o le a’oa’o atu le finagalo o le Alii i isi o tatou uso o loo pogisa i le feau o le Tala Lelei ia Iesu Keriso. O le tatou amio fa’aaloalo, amio pulea, toaaga i le aoga Aso Sa ma le lotu,

usita’i ma faalogo i matua; o amio ia ta te a’oa’o ai isi tamaiti ina ia fai ma so’o moni o Iesu Keriso.

**GALUEGA FAATINO:** Taliga Fesili

Tali Fesili e faatatau i le tala sa faitauina:

1. E toafia soo na filifilia e Iesu?  
Tali: 12
2. Aisea ua na o le sefulutasi ai soo na o ane ia Iesu i Kalilaia?  
Tali: Ua leai Iuta lea sa faalataina Iesu.
3. O le a le manaoga o Iesu i ona soo?  
Tali: Tala’i le Tala Lelei i le lalolagi.
4. O le pule a ai na tuuina i le au soo e faamalolo ai tagata mama’i?  
Tali: O le pule mai le Atua.

**PESE:** Ia fai ma sulu e mumu

**A’OA’OGA:**

1. Ia fai i tatou ma so’o moni o Keriso.
2. Ia faailoa le Tala Lelei a Iesu Keriso.
3. O le faaolataga na faia e Iesu mo le lalolagi uma.

.....



**ASO SA: 8 SETEMA 2019**

**MATAUPU: UA LĒ LAVĀ MOSE**

**SINI:** Ia malamalama tamaiti, o le galuega sa feagai ma Mose, e le o se galuega e faigofie. Ao le fefaasoa'i ma isi uso a tagata, e māmā ai se avega.

**TUSI FAITAU:** Numera 11: 10- 15

### **FESOASOANI MO FAIAOGA:**

Fai mai na faafogaina e le Atua le leo o le oi ma le tagi o lona nuu o Isaraelu, ona o le pologa ao i ai i Aikupito; ona faaali lea o le Atua ia Mose i le laau talatala ao mu ae lē matineia, ina ia alu atu ma aveesea mai lona nuu mai Aikupito.

O le o ese mai la o le nuu mai Aikupito; o se vaega la lea o lea malaga sa tatou faitauina, ao agai atu i Kanana i le nuu folafolaina, e tele ni faafitauli sa fetai'a'i ma le nuu. O faafitauli la o loo tutupu nei i le malaga; i le fetagisi ma le fetomumui o tagata ona o le lē lelei o meaai, fia feinu, feoti i le ala sa sili ai peana nonofo pea i Aikupito. Ua fai ia mea ma avega mamafa ia Mose. Peita'i, o nei muimuiga ma fetagisiga uma o loo fai ia Mose; o le lē fiafia lava lea o le nuu i le Atua. O le ala lea o le toasa o le Atua, ma ua leaga lea ia Mose.

Ua avea le toasa o le Atua ma ala o le taumafai atu o Mose e fa'aalia lona lē fiafia, aua e foliga mai o Mose le pogai o le fetagisi o le nuu. O le tali atu la a Mose i le Atua, o le fa'aalia lava lea o lona lē fiafia i le galuega na faatonuina ai o ia. Fai mai Mose i lona manatu; E le o sana fanau na fanaua mai i lona manava lenei nuu; ina ua faatonuina o ia e alu ma aveese mai le

nuu mai Aikupito; e pei ona faia e se tausī tama i se tama meamea e sapai i lona fatafata, seia oo i le mea o mana'o iai. O le fuaiupu e 13 ma le 14; O loo ta'utino ai e Mose lona lē maua o se mea e avatu e tali ai le mana'o o le nuu. Aua ua lagona e le nuu uma le fia aai manu fasi; e pei ona iai i Aikupito e fau ma soloi meaai eseese. A ua ta'utino ai foi e Mose lona lē lavā amo toatasi lenei avega, ona o le tau faamalie o mana'o o le nuu.

Tamaiti, ai ona na o Mose na iloa le fa'aaliga i le laau talatala, na o ia foi na fetalai i ai le Atua i le aveesea mai o Isaraelu ma Aikupito; Ua taumafai toatasi ai lava lenei galuega, ae sa tatau ona tofi ni ta'ita'i mai i ituaiga taitasi e fai ma fesoasoani ia te ia. Masalo ana o se isi o tatou tamaiti lea sa fai ma Mose i le taimi lea; ua sola ae tia'i le nuu i le vao.

Ao lea ua ta'utino e Mose le faigata o le nuu, o le ala lea o lona lē lavā ave toatasi le nuu uma aua e mafatia ai o ia. Faatasi ai ma lana aioiga, pe afai e toasa faapea le Alii ia te ia; Ia fasioti lava ia e le Alii; ae aua nei oo o ia i ia puapuaga. E le faigofie la le galuega sa tauivi pea ma Mose. E fai o le toatele o le nuu, tausaili ni mea e faamalie ai o latou manao; ao le tigā o le ulu i upu ma tala o loo faalogo atu iai. O le lē lavā la o Mose, o le faaalia lava lea o le vaivai o lona faatuatua i le Atua. Ua galo ia Mose e le oge le Atua i se mea. Soo se mea tatou te ole ma valaau atu ai ia te Ia, e tali mai lava o Ia ia i tatou. E faapena foi i lenei vaitau o le tatou ola a'oa'oina. E mafua ona tatou lē lavāvā suesue, ona ua vaivai lo tatou ola faatuatua i le Atua. Ao le tumau ia te Ia, e maua e ia le manuia e faavavau.

### **GALUEGA FAATINO:**

Fa'aaoga upu o loo i le lisi e faatutumu ai avanoa. (toasa, agaleaga, alofagia, tama meamea, tauto)

1. Afai ua ..... au e oe, ia e fasioti ia te au.
2. E pei o le tausī tama na te fusi i le .....  
..... seia latou oo i le mea e loto iai.
3. Ua ou aveina ae i le laueleele na e ..... ai i o  
latou tamā.
4. O le fetagisi o le nuu na tupu ai le ..... o le Alii.
5. Ua fai atu foi Mose i le Alii; aiseā ua e ..... mai  
ai ia te au.

**PESE:** I'm in the Lord's army

**A'OA'OGA:**

1. Tatou te mafaiā mea uma i le faatuatua i le Atua.
2. Fesili i le Atua lo tatou faasino ala.
3. E leai se mea e faigata i le Atua.

.....

**ASO SA:** 15 SETEMA 2019

**MATAUPU:** GALULUE FAATASI E TINO MAI  
AI SE FAAMOEMOE.

**SINI:** Ia malamalama tamaiti, e taua le ola  
galulue faatasi. E le gata ina faigofie ma  
māmā ai se galuega, ao le faatinoina o le  
finagalo o le Atua i le ola felagolagoma'i.

**TUSI FAITAU:** Neemia 4: 1- 6

**FESOASOANI MO FAIAOGA:**

O le tala lea sa faitauina tamaiti; o le tala i le taimi na taumafai ai Neemia e toe ati le pa o Ierusalemā. O Ierusalemā, o le aai o tapuaiga a tagata Isaraelu i le Atua. E si'omia e lona pa, e malu puipuia ai le faatinoina o tapuaiga i le Atua. Na faaleagaina la le pa lea i le malosi o Papelonā ma faatafea ai le nuu o Iuta i ona laueleele. O le tafeaga la lea sa faatafea ai ma Neemia.

O Neemia la, sa fai ma auauna i le maota o le tupu, e ala i le tautu uaina. Ua oo i le tasi aso, ona alu ane lea o Neemia e momoli le uaina a le tupu; ma iloa ai e le tupu le mata faanoanoa o Neemia. Na fesili le tupu pe aiseā ua faanoanoa ai? Fai mai le tali a Neemia; "Ia soifua oe e faavavau le tupu; a ua ou faanoanoa, aua ua faatafunaina le aai, o le mea o iai tuugamau o ou tamā, ma ona puipui ua faaumatia i le afi." Na talosaga Neemia e fia alu atu i lona aai, sei fai se galuega mo le toe faaleleia o le pa ua faaleagaina. Na alofa le tupu ia Neemia e tusa ma lona faanoanoaga. Ona ia faataga lea ia Neemia ma nai tagata nai ia te ia, ina ia o ae mo lea faamoemoe.

Fai mai la tamaiti, na o atu Neemia ma nai tagata toaitiiti lava ma amata loa ona fai le galuega. Na iloa e Sanepalata ma tagata na lei o i le tafeaga, le galuega lea ua amata ona faia e i latou na o i le tafeaga. Ona tupu ai lea o le ita ia Sanepalata, ua matuā tigā lava. Ona faatauemu atu lea ia Neemia, ma ua ta'u atu i e na lei o i le tafeaga ma le itutaua uma a Samaria; "Se a le mea o faia e ia tagata vaivai o sa Iutā? Pe tu'u ai pea ea i latou? Latou te faitaulaga ea? Latou te faauma ea i le aso e tasi? Latou te atiina ae ea maa ai faupuega otaota ua susunuina? O le mea lava ua latou atia, e alu ae iai se alope na te soloia i lalo." Tamaiti, o upu e tau faifai ma le faatigā loto a i latou nei ia Neemia, ina ia faavaivaia ma tuu ai le galuega. Peita'i, e lei avea nei faafitauli ma ala e muta ai le tuuina atu pea o lenei faamoemoe lelei i le Atua. Fai mai ua valaau atu Neemia i le Atua; Ina ia faafofoga mai i upu tau faifai ai latou nei, aua ua inosia lava i latou ona o le galuega ua faia.

Faamata ana o se isi o tatou lea e faifai mai ai nisi tamaiti poo nisi tagata; o le a se mea e oo iai tatou? Ioe, tatou te mamā, tuu loa ma le galuega e lē uma ona fai. Ia, poo le oso ane foi o le ita ma oo ai ina femisaa'i. Peita'i o le auala ua aumaia e Neemia i le tala o lenei aso sa; E lē o le ma, poo le ita e maua ai malō, ao le tumau i le faatuatua faamaoni i le Atua, e faaeaina ai ma avea ma atalii o le Atua. O le auala foi lea e tatau ma tatou tamaiti. Aua tatou te tali atu i e ita mai, ae tuu i le Atua e fai lana faamasinoga amiotonu. E lē maua mea lelei pe a lē loto faatasi. Ae mafai e le loto faamagalalo ma le lē taumasui ona faataunuu se faamoemoega lelei. Tusa poo a faafitauli e tutupu mai, poo le toaititi foi e faatinoa. E mafai lava pe a faatuatua ma faalagolago tasi i le Atua.

**GALUEGA FAATINO:**

Faaaoga le tusi sa faitauina e faauma mai ai fuaiupu o loo i lalo.

1. Se a le mea o faia e ia tagata .....?  
Tali. (vaivai o sã Iutã)
2. Latou te toe atiina ae ea maa ai faupuegã-otaota .....?  
Tali. (ua susunuina)
- 3 ..... ia e faafofoga mai, aua o loo inosia i matou....  
Tali. (Lo matou tama e,)
4. Aua nei ufiufitia foi lo matou agaleaga, aua foi nei soloiesea ..... la latou agasala.  
(Tali. (i ou luma)

5. Ua matou atia le pa: ..... e oo i lona vaeluaga lemū.

Tali: (ua fesoota'i foi le pa uma)

**PESE:** Afai tatou te galulue faatasi.

**A'OA'OGA:**

1. E māmā se avega pe a galulue faatasi.
2. Ia tumau i le Atua i taimi o faafiatauli
3. O le faatuatua e mafai ai mea uma.

.....

**ASO SA: 22 SETEMA 2019**

**MATAUPU: TUMAU I LE ALII E MANUIA AI**

**SINI:** Ia malamalama tamaiti, e leo se mea lelei le ola femoumoua'i. Ao le tumau i le Alii ma le faatuatua faamaoni, e maua e ia le mea lelei.

**TUSI FAITAU:** Ioane 15: 1- 11

**FESOASOANI MO FAIAOGA:**

O Ioane tamaiti, o le uso o Iakopo. O le au-uso lona lua lea na filifilia e Iesu e fai ma ona so'o. Manatua foi o Peteru ma Aneterea, o ulua'i so'o filifilia ia. Sosoo ai lea o le fanau a Sepetaio, o Iakopo ma Ioane, o tagata faifaiva i latou.

O Ioane Ia, e ta'u o le so'o alofaina, o so'o e sefulu ma le lua o Iesu. O ia tonu lea e ana tusitusiga ia ua faamauina; ma ua ta'ua ai o le fai Evagelia. E le tutusa uma tusitusiga a fai Evagelia. E iai tala e tutusa ai, ae eseese le faamatalaina, e fua i le faamamafa a le fai Evagelia lava ia.

O le tele lava la o tusitusiga a nei fai Evagelia tamaiti; o loo latou aumai ai tala faafaataoto na fetalai ai le Alii o Iesu, e momoli mai ai se fe'au taua mo i tatou. E pei foi o le tala sa tatou faitauina. O se tala faafaatusa sa fetalai i ai Iesu, i le fesootaiga a le tagata, Iesu, ma le Atua. Ua Ia fa'aata mai ai o le faitogā vine, o le vine ma ona lālā. O le tagata Ia e ana le vine; o le Atua. O le vine, o Iesu; Ma lālā o le Vine; o tagata.

E le toe tau faailoa le faagasologa o le taumafai o le tagata faitogā laau, e aputiputi ma faapelepele le totoina o ana tama'i laau, ina ia ola lelei. E oo lava ina telē ma lapoa le laau, e mata'itu lava lana laau ina ia fua mai e tusa ma lona finagalo. Manatua foi tamaiti, o le laau pe a lelei le tatou faasaienisi; o lālā e pipii i le ogalaau, ma faalagolago iai mo le aumaia o minerale e ola lelei ai.

Ae fai mai le tala; O la uma e lē fua, e aveeseina e Ia; ao la uma e fua, e teuteu e Ia ina ia fua mai ai atili. Manatua foi tamaiti, a tipi ese se lālā o se laau, o lona uiga ua lē aogā. O lona iuga o le a susunuina i le afi. O le faatusa lena o tatou. Ua a'oa'oina i tatou i le upu a le Atua i le Feagaiga Tuai; ua tatou malamalama foi i le faaolataga na saunia e Iesu Keriso. Afai la tatou te lē usita'i i le upu, ma lē taliaina lea faaolataga; e le o tatou la o ni lālā o le vine moni. E le o tatou o ni so'o o Iesu. E leai so tatou avanoa i le maota o i le lagi, auā o le a le molimau le Alii o Iesu Keriso mo i tatou. O le iuga lena o le lālā e le fua. Ao lo tatou faatusa lena, pe a tatou le taliaina le upu ma le Tala Lelei ua aumaia mo i tatou.

O lālā e fua, e teuteu e Ia ma fua atili mai ai. O le ata lena o le tagata e tumau i le upu a le Alii. O le a faapena foi ona tumau le

upu a le Alii ia te ia. E faia foi e Ia so o se mea e te mana'o ma ole atu ai. O le tagata foi e tausia poloaiga e pei ona tausia e le Alii o Iesu; o le a faapena foi ona alofagia o ia e Iesu e pei ona alofagia o Ia e lona Tamā. O lona uiga la tamaiti; o i tatou uma lava e lē tumau ia Iesu, o le tatou iuga lea. O le a aveesea i tatou ma susunuina i le afi. O nisi o tatou, e fiafia tele i le finagalo o le Alii ao laiti; ae oo ina matutua, ua matua ese lava le mea e faasaga iai. Ao le tamaititi e tumau i le alii o Iesu; o le a maua e ia ona manuia e oo i le faavavau, faavavau lava..... Amene.

### **GALUEGA FAATINO: Tali i le Sa'o poo le Sesē**

Taliga Fesili: Tali i le sa'o po le sesē.

1. O Iesu o le vine moni.

Tali: Sa'o

2. O tagata, o galulue vine.

Tali: Sesē

3. O lālā vine o tamaiti/ tagata

Tali: Sa'o

4. O le iuga o lālā lē fua, e faapotopotoina ma lafoaina i tuā pa, pe susunuina i le afi.

Tali: Sa'o

5. O le tumau ia Iesu, e tumau foi ana upu ia te ia.

Tali: Sa'o

**PESE:** Ou te tumau ma pipii mau

**A’OA’OGA:**

1. Tumau ia Iesu e fua mai ai i fua lelei.
2. Aua le ola femoumoua’i
3. Na o le Faaolataga le ala i le malo e faavavau.

.....

**ASO SA: 29 SETEMA 2019**

**MATAUPU: SAILI FESOASOANI PE A MAFATIA**

**SINI:** Ia malamalama tamaitii, e le mafaia e se tagata e toatasi ona faamalie manaoga o ni tagata e toatele; e ao ai ona saili mo se fesoasoani.

**TUSI FAITAU:** Esoto 18: 17- 23

**FESOASOANI MO FAIAOGA:**

O Mose o le sitiseni Aikupito. Ao lona tupuaga o le Eperu. Sa nonofo ma le afafine o Ietero, ma maua ai la le laua fanau e toalua o Keresoma ma Elisara.

Na tuua e Mose le aiga o Ietero ae alu i Aikupito e tusa ma le finagalo o le Atua, ia aveesea Isaraelu mai Aikupito. O le o ese mai la o le nuu mai Aikupito, na matua tele ai faafiatauli, ma le tomumu o tagata ia Mose; ona o mana’o le faamalieina i meaai ma vai inu, aemaise ai o le nofo vao ma feoti ai o tagata i le ala, ao agai atu i le nuu folafolaina.

O nei mau faafiatauli ma tomumu a le nuu o loo faia ia Mose; ua fai ma avega mamafa i lona mafaufau. Fai mai ao tolauapi le

nuu i Sinai ma malolo ai; ae na iloa e Ietero le mea na faia e le Alii i le aveesega o Isaraelu mai Aikupito. Na oo ane Ietero e momoli ane Sepora le avā a Mose ma lana fanau, ina ua taunuu manuia le o ese mai Aikupito. O ina na iloa ai e Ietero le mea o loo tupu ia Mose ma le nuu. Aua na faamasino e Mose le nuu uma na o ane ia te ia; ua laulaututu mai lava i le taeao seia oo i le afiafi.

Ona faailoa ane lea e Ietero ia Mose le lelelele o le mea o loo ia faia; aua ua matuā tigaina o ia toatasi; ao le mafatiaga foi ua oo nei i le nuu atoa. O se faaiuga lelei na faia e Ietero mo le tauaveina o le nuu. Fai mai Ietero ia Mose; Ia fai oe ma **tautuu upu**; o lona uiga tamaiti; pau lava le galuega o le a gafa ma Mose, o ia o le a fesoata’i ma le Atua i so o se manaoga o le nuu. O le a foi le finagalo o le Atua i le nuu; o ia foi na te ta’uina i le nuu. Ia tatau ona faamalamalama lelei i le nuu tulafono ma faatonuga, faailoa iai le ala e savavali ai, ma mea e tatau ona latou faia. A lelei vaega ia , ona filifili mai lea i le nuu atoa ni tagata loto tetele ma matata’u i le Atua O tagata e faamaoni ma inoino i le manumanu, e fai ma ta’ita’i i le nuu. O nei tagata, ua faatulaga e Ietero e fai ma ta’ita’i o ta’itoaafe, ni ta’ita’i o ta’itoaselau, ni ta’ita’i o ta’itoalimasefulu, ma ni ta’ita’i o le ta’itoasefulu. O i latou ia latou te faamasinoina tagata i vaega ua tofia ai, ma faaoo ia Mose faaiuga fai. A iai ni mataupu ogaoga ma faigatā, ona ave lea e fai e Mose le faaiuga. O se faaiuga talafeagai ua faia, e fesoasoani ai i le ta’ita’i loto mafatia, ina ia sologa lelei le malaga aga’i atu i le nuu folafolaina.

Tamaiti, ua ave nei mau faafiatauli ma ala ua galo ai ia Mose ona saili se fesoasoani i le Atua. Ua la’u na o le mau gaosā o faafiatauli o tagata; a ua le manatu ifo i ona foi faafiatauli. Lea ua ala mai ia Ietero le finagalo o le Atua, i se faamāmā avega o lana galuega. E taua la lo tatou mafaufau lelei. Fetuutuuna’i o tatou mafaufau i mea ua le mafai ona tatou faia; ma saili se fesoasoani

ina ia sefe ai tatou mai faalavelave tutupu, aemaise o le apoia gofie ai e faama'i. E pei foi ona faia e lo tatou alii o Iesu. Na saili lava i lona Tamā, na ia mafaia ai le oti ma le tuugamau, ona o tatou tagata agasala..... Ia manuia ona o Iesu.... Amene.

**Uiga o Upu:**

- i) Tautu'u upu - soo upu
- ii) Manumanu - ai'u, lima mau

**GALUEGA FAATINO:** Tusitusiga Faamatala:

O Mose ma Ietero. Fa'aaoga igoa e lua sa taua i le tala, e faamatala mai ai ni uiga lelei e tatau ma aoga mo i tatou le fanau.

**PESE:** God is so good

**A'OA'OGA:**

- 1. Ia saili se fesoasoani pe a mafatia.
- 2. Ia fesili i le Atua mo se faamāmā avega.
- 3. Aua tatou te faamoemoe i so tatou malosi.

.....

**Ia manatua – E malolo Aso Sa 6, 13, & 20 Oketopa mo le Lotu Tamaiti.**

**ASO SA: 27 OKETOPA 2019**

**MATAUPU: UA TOE AAMI IEFATA E LE NUU**

**SINI:** Ia malamalama tamaiti, o Iefata na tuliese e ona uso ma sola ese ai ma nofo i le nuu o Topa. Ona o le malosi sa ia te ia mai le Alii, na mafua ai ona toe aami i le taua a Isaraelu ma Amoni.

**TUSI FAITAU:** Faamasino 11: 1- 11

**FESOASOANI MO FAIAOGA:**

O le tinā o Iefata, e le o se fafine lelei pe a fua i le upu talitane. O lona uiga o le fafine agasala. Ae na ia fanaua se tama e toa ma malosi, ma faaigoa ia Iefata. Na tuliese e isi ona uso ona o le tulaga o lona tinā i le siosiomaga, ma o se fafine foi o nuu ese. E le o se mea lelei lea i se siosiomaga o se aiga; o le tusitusilima ma le faasinoesea o se isi uso poo se tuafafine e pei ona faia ia Iefata. E lei tali i se upu pe tau faailoa lona piitaga; aua o loo manino mea uma, o ia foi o le Isaraelu, ona o lona tamā. Na tulai gūgū ma sola atu ma nofo i le nuu o Topa. O Topa o se itumalo i le itu i Sasa'e o le Ioritana. O se ogaeleele i Matū o Perea i le va o Suria ma Amoni. Ai o le ala lea o le ō ane o toelaiina o Kiliata e toe aami le latou tama, ina nei fa'aaoga mai e Amoni i le taua ma Isaraelu o le a fai nei.

E lei avea maseiga ma le agaleagaina o Iefata e ona uso, e tauimasui atu ai i lona nuu ma ona tagata. Na fia iloa e Iefata se finagalo o toelaiina o lona nuu; o le mafuaaga lea o lona faailoa o mea na alu ese ai, ao lea ua toe ō mai mo se fesoasoani? Fai mai na tali atu toelaiina ma le loto maulalo tele i le toa malosi o Iefata; Fai mai le tali a toelaiina; "O le mea lava lea ua matou toe

faasaga mai ai ia te oe, tatou te malia ma i matou, ma e tau ma le fanauga a Amoni, ona e fai lea ma alii sili i e nonofo uma lava i Kiliata”. Na iloa lelei e Iefata e tuuina mai e le Atua le nuu o Amoni i lona lima. O le ala lea o le toe fesili, pe faamaonia a latou upu. Fai mai le toe tali a toeaiina; “E faafofoga mai le Alii ia i tatou, pe afai matou te le faia e tusa ma lau fetalaiga”. Fai mai ona tula’i lea o Iefata ma o ma toeaiina o le nuu. Ona fai ane lea e Iefata o ana upu uma i luma o le Alii i Mesepa.

Tamaiti, e le fia tauimasui Iefata. E lei avea faafitauli ma ala e aveesea ai lona piitaga o ia o le Isaraelu. Afai na iloa e Iefata e tuuina mai e le Atua Amoni i ona lima; o lona uiga, o se tagata e pipii tele i le Atua. E le fefē pe popole i se mea. E tumau lona faamoemoe i le Atua, mo lona faasinomaga. O le tuliese a Iefata ona o se mafuaga talafeagai i manatu o ona lava uso; Ae o loo aumai ai i ina ma finagalo alofa o le Atua i le tagata ua tuulafoaina. O le tagata ua lē amanaia e le siosiomaga o tagata, ae fa’aaogaina e auala mai ai le faaolataga a le Atua. Ana lē talia e Iefata le savali a lona nuu, e toe faoa uma laueleele o Amoni, na maua e Isaraelu i le taimi o Mose ma Iosua, i le agai atu i Kanana. E le gata la o ona laueleele, ao le tele o ni soifua o Isaraelu o le a maumau. O se faaolataga na avea ai Iefata ma faamasino i le nuu o Isaraelu i tausaga e ono.

Tamaiti, ia tutusa le tatou vaai i tagata uma. Aua tatou vaai maualalo i isi o tatou uso a tagata. Aua foi tatou te inoino ma faatauemu i isi tagata; O i latou na e maua ai lo tatou fesoasoani i nisi taimi. O Iesu foi na afio mai i se auala faatauavaa ma le le taualoa; Na inosia ma amusia i taimi o lana galuega. Lea lava na oo ai i le satauro ma toe tu mai ai i le oti ma le tuugamau pogisa, ina ia faaolaina ai i tatou la fanau agasala.

**GALUEGA FAATINO:** Taliga Fesili.

1. O se fea Iefata?

Tali: Kiliata/ Isaraelu

2. Aiseā na agaleaga ai ona uso ia te ia?

Tali: O lona tinā o le fafine o nuu ese.

3. O fea na sola ma nofo ai o ia?

Tali: O le nuu o Topa.

4. O le a se agavaa o Iefata na mafua ai ona toe aami e Kiliata?

Tali: O ia o le toa malosi.

5. O ai na tau ma Isaraelu?

Tali: Amoni.

6. O le a le mafuaga o lea taua?

Tali: Toe mana’o Amoni i ona laueleele na faoa e Isaraelu.

**PESE:** O maia tatou uma, ma mafuta fiafia.

**A’OA’OGA:**

1. Aua tatou te tusitusilima i isi tagata.
2. Aua tatou te tauimasui
3. E fa’aaogaina e le Atua tagata le amanaia, e ala mai ai lana faaolataga

.....

**MANATU TAIALA NOVEMA: AUA E TE SE'E ESE  
MAILE ALA**

O le ala o faa-autu i ai lenei masina, o ala ia o lo tatou Alii o Iesu. O ala o le Alii o faasinoga tatau ia e ao ona tatou savavali ai, auā o ala e tini i le manuia o lo tatou ola. A tatou ui i nei ala, e tatau ona faalagolago i le Alii e fesoasoani mai ma tausisi iai e lē aunoa.

**ASO SA: 3 NOVEMA 2019**

**MATAUPU: TUMAU LO OUTOU FAAMAONI**

**SINI:** Ia malamalama le vasega, e finagalo le Alii ia faamaoni i le amiotonu a le Alii ma ia tumau ai i taimi uma o le ola.

**TUSI FAITAU:** 1 Korinito 15: 5 – 8

**FESOASOANI MO FAIAOGA:**

O le tatou mataupu o lenei Aso Sa, ua faamatalaina ai se vaega o faatonuga ma faamafanafanaga a Paulo i tagata Kerisiano i Korinito i lo latou taliaina o le Toetu o Keriso, na manumalo ai le Alii i le oti. O le maliu o Iesu Keriso i le satauro ma lona toetu mai, o le manumalo foi lea o i tatou, auā na maliu o Ia, ia magalo ai a tatou agasala. O le mea lea tatou te faafetaia ai lo tatou Atua, ona o lo tatou Alii o Iesu Keriso ma le taulaga na Ia faia.

O le manao o Paulo, e tatau i tagata uma ona talia le toetu o Keriso, i le salamo ma le faatuatua. Afai na molimau Peteru

(Kefa), ma le faitau selau o tagata faatuatua i le toetu o Keriso, o se feau lea mo le au Kerisiano uma oi Korinito. O lo latou faamaoni i le taliaina o le Tala Lelei, o lo latou maua foi lea o faamanuiaga mai le Alii. Sa faasolosolo faailoa Iesu i tagata ma ona so'o i le taimi o le toetu. Ai lava o lona finagalo, ia saga mausali le tutumau faamaoni o ona tagata i le vavega uiga ese na faia e le Alii. Tamaiti e taua tele lo tatou fiafia i le Alii ma amio lelei pei o Ia. O lo tatou tumau moni i le ola talitonu ia Iesu, e aofia ai lou ola faamaoni, amio lelei, toaga i le lotu ma le aoga Aso Sa, fiafia e faitau le Tusi Paia e le aunoa, alofa i ou matua, ma isi lava amioga lelei e tele.

**Uiga o Upu:**

- i) Kefa - Peteru lava lea.
- ii) fanau le au - fanau e lei oo i le taimi e fanau ai
- iii) isi ua momoe - feoti

**GALUEGA FAATINO: Tusiga Fuaiupu**

Tusi mai ni fuaiupu i upu nei:- tumau, alualu, faamalosi, faalēaoga, tautiga.

**PESE:** A tumau ia Iesu

**A'OA'OGA:**

1. Ia tatou talitonu ma tumau ia Iesu
2. Ia toaga i le lotu, Aoga Aso Sa ma alofa i matua
3. Galue faamaoni e tauia mai.

.....



**ASO SA:** 10 NOVEMA 2019

**MATAUPU:** FAALAGOLAGO I LE ALII I SOO SE TAIMI

**SINI:** Ia malamalama le vasega, tatou te manumalo ma filemu pe afai tatou te valaau i le Alii mo se fesoasoani.

**TUSI FAITAU:** 2 Nofoaiga Tupu 14: 9 – 15

### **FESOASOANI MO FAIAOGA:**

Tamaiti, o lo tatou olaga e faamoemoe mea uma i le alofa o lo tatou Atua. Pe afai e solo lelei ma filemu le gasologa o le ola, tatou te viia ai lo tatou Alii. Afai foi e oo mai faigata ma tulaga e tupu ai lo tatou ita, o lo tatou Alii lava e faalagolago iai.

Ina ua maliu Avia, ona avea ai lea o Asa lona atalii e fai ma tupu o Iuta. O lana nofoaiga i le amataga, sa filemu ai le nuu ua leai ni taua. Peitai na omai ia te ia o Sera le Aitiopie ma ana 'au e afe o afe, o Kariota e tolu selau e tau ma i latou i le aai o Maresa. E ui i lenei anoano o 'au a Sera, ae na loto tele lava Asa le tupu o Iuta e tau ma ia, i le vanu o Sefata i Maresa. Sa le ma faitaulia le au tau a Iuta, i le toatele na'ua o le 'au a Sera. Na iloa e Asa lea mea, ona valaau atu lea o ia i lona Alii le Atua. Ua ia tatalo atu auā ua talitonu o ia, o lona Alii e leai se mea e faigata ia te Ia. O le Atua e faalagolago i ai lē ua vaivai i lona alofa fesoasoani mai. O le suafa foi o le Atua e manumalo ai i le taua ma nei tagata ua faasaga tau mai ia i latou. Na aioi atu foi Asa le tupu o Iuta – “.... Le Alii e, o oe lava lo matou Atua, 'aua nei manumalo mai tagata ia te oe.”

Tamaiti, e faafogaina ma tali mai le Alii i so o se tagata e faalagolago atu ia te Ia. Na fasia e le Alii o Aitiopie ao vaavaai i

ai Asa le tupu. O e foi na sosola i Kira na tuliloa e Asa ma Iuta ma faaumatia uma, ona o le malosi o lo latou Atua. Na latou vetea foi o aai uma, ma fale o manu, ae fai mo latou le vete sa i ai. Na toe foi ma le manuia le nuu o le Atua i Iuta ma ave le vete, e aofia ai ma mamoe ma kamela e matua tele lava.

Tamaiti, so o se mea faigata ma tatou popole ai i lenei ola, tatou faalagolago i le Alii mo lana fesoasoani mai. Tatalo i le Alii ma tuuina atoa atu ia te Ia lo tatou faamoemoe. 'Aua tatou te faalagolago i lo tatou malosi e tau ai. Na o le Alii le Atua le puluvaga mo o tatou mafatiaga i le tino, mafaufau ma agaga. Faalagolago ia Iesu le Alii alofa.

### **Uiga o Upu:**

- i) kariota - o le taavale e toso e solofanua
- ii) tulimulia'u - mulimuli atu i isi tagata o muamua
- iii) vete - o mea ua faatotoe ina ua uma se taua.

### **GALUEGA FAATINO: (Faafeso'otai uiga o upu)**

Faafesootai uiga o upu o i le agavale o loo i le taumatau.

- |    |               |                           |
|----|---------------|---------------------------|
| 1. | Asa           | nofoaga na fai ai le taua |
| 2. | vanu o Sefata | tupu o Iuta               |
| 3. | Sera          | faamoemoe                 |
| 4. | faalagolago   | tupu o Aitiopie           |
| 5. | fasia         | siosiomia                 |
| 6. | vagavagai     | faaumatia                 |

**PESE:** Faalagolago i aao o Iesu

**A’OA’OGA:**

1. O Iesu lo tatou olataga.
2. Tatalo i le Alii e le aunoa
3. Pipii i lou Alii i taimi o faigata.

.....

**ASO SA: 17 NOVEMA 2019**

**MATAUPU: IA TAUSISI I LE ALOFA**

**SINI:** Ia malamalama le vasega, o le tagata e tumau le alofa i isi tagata, o le faailoga foi lena ua na iloa atu le Atua.

**TUSI FAITAU:** 1 Ioane 4: 7 – 12

**FESOASOANI MO FAIAOGA:**

Tamaiti, ua tatou iloa uma, o le alofa e taua. O le alofa o le lagona i o tatou tagata e mafai ona faatinoina i lo tatou olaga. O Ioane, o ia sa fai ma so’o o le Alii i lana galuega i le lalolagi. Ua ia fa’aali mai ia i tatou, o le Atua le puna o lo tatou alofa, auā na Ia alofa ia i tatou ina ua Ia faia le taulaga o le Faaolataga e ala i lona Alo o Iesu Keriso. O Iesu le faataitaiga o le alofa, aua o mea uma na Ia a’oa’o mai ai i lona olaga, se ia oo i lona maliu, o faatinoga uma o le alofa. E tupu le alofa i totonu ia te oe ma a’u, ona o le fesoasoani mai o le Agaga Paia. A tatou alolofa i isi tagata i o tatou loto atoa, o lo tatou alolofa lava lena i le Atua. Afai foi ua tatou lē alolofa i isi tagata, ua tatou le iloa foi le Atua.

O le mea lea le fanau e, afai ua alofa mai lo tatou Atua ia i tatou, e ao foi ina faapea ona alolofa i le Atua ma tausisi ia tumau ai i taimi uma. O le alofa na te faatupuina le nonofo lelei o i tatou ma isi tagata, ma atia’e le ola fealofani. Afai ua silafia e lo tatou Atua, ua sauni fiafia tatou e talia isi tagata i le alofa, na te taitai mai foi i latou ina ia maua le mafutaga fiafia ma i tatou. Ma o le atoaga lena o le alofa ua i totonu ia i tatou.

Tamaiti, o le alofa ua faamatalaina ma tatou molimauina i mea uma na faia e le Atua. (1) Na ia foafoa mea uma ona o lona alofa, ia faapena foi ona maua e le tagata. (2) O lana tausiga alofa, e mo tagata uma e oo lava i tagata agasala. (3) Ua tatou saoloto ai e filifili ina ia fua mai le alofa ia tatou filifiliga. (4) Ona ua tatou agasala ma sese ese mai faiga filifiliga, o lea na maliu ai Keriso i le alofa mai ia i tatou. Na ia saili ai le fofo i lo tatou faafitauli o le agasala. (5) Ia maua e i tatou le ola faavavau i le mafutaga alofa ma le Atua.

**GALUEGA FAATINO: Faatumu avanoa**

Filifili le upu sa’o i le lisi o upu o i lalo e faatumu ai avanoa i le parakalafa:- togiola, Alo, iloa, alofa, fealofani, agasala.

E finagalo lo tatou Alii ia tatou \_\_\_\_\_, aua o le Atua o le \_\_\_\_\_ lava Ia. O sē ua lē alofa, ua lē \_\_\_\_\_ foi e ia le Atua. Sa fa’aalia le alofa o le Atua ia i tatou, auā na Ia auina mai lona \_\_\_\_\_, o le \_\_\_\_\_ mo a tatou \_\_\_\_\_.

**PESE:** Le alofa o le Atua, pei o se lio tele.

**A’OA’OGA:**

1. Alofa i ou tuaoi

2. Ia tatou fealofani
3. Ia tumau lou alofa.

.....

**ASO SA: 24 NOVEMA 2019**

**MATAUPU: E SILI LAVA ALA O LE ALII**

**SINI:** Ia malamalama le vasega, e finagalo le Alii ia tatou savavali i ona ala, aua tatou te taunuu ai i le mafutaga fiafia ma Ia.

**TUSI FAITAU:** Isaia 55: 6 – 9

**FESOASOANI MO FAIAOGA:**

Tamaiti, o le valaau a le perofeta o Isaia ia Isaraelu le nuu o le Atua, o se valaau foi lea mo i tatou uma. O le valaau i le faaolataga i le taimi nei ma faamanuiaga mulimuli mai. O le valaau tatou te iloa ai le ala e faasaoina ai le tagata.

Fai mai Isaia, e tatau i le tagata o tau mamao ma le Alii, ona saili o Ia. O lo tatou Atua, e le finagalo e alu ese ma i tatou. Oi tatou lava ua masani i le o ese mai le Alii ma atia’e tuaoi ua tatou va ai ma le Alii, e ala i agasala ma mea leaga ua tatou fai. O le alaga a le perofeta ia Isaraelu, e ao i tagata ona le toe faatali. Ia salamo ma faatuatua i le Atua, ma ia liliu loa e savavali i ala o le Alii, aua a oo ina latou tafefea ese mai le mafutaga ma le Atua, o le a feagai i latou ma puapuaga.

Tamaiti, afai o a ni amioga leaga ma ni manatu leaga o tatou maua ai i lea aso ma lea aso, ua tatau nei ona lafoa’i ese ae foi e ola i ala o le Atua. Ua na o lo tatou Atua lava e faamagaloina i tatou, aua o Ia lava o le alofa. O lona alofa e finagalo ai ia liliu mai lana fanau ua mamao ese, o loo pule ai le leaga. O le

motusia ma le vava mamao o i tatou ma le Atua, e faapogai lava o i tatou, ona ua galo le Alii i o tatou loto, ae faasaga atu i le leaga.

Tamaiti, e i ai ea se mea lelei tatou te taunuu iai, pe afai tatou te savavali i ala o le faamaualuga, loto leaga, faatupu vevesi, gaoui, faalata, taufaaleaga, ma isi? E leai, ua na o taunuuga inosia ma faalumaina e tino i ai, aua o ala na o Satani e iu lava i le malaia. O le mea lea e sili ai lava ala o lo tatou Alii, aua e tini i le fiafia, faaeaina, olioli, filemu, manuia, ma isi mea lelei e tele.

**GALUEGA FAATINO: Faatumu Avanoa**

Saili mai upu o i le tusi sa tatou faitauina, e faatumu ai avanoa i fuaiupu.

1. Ia outou saili i le Alii \_\_\_\_\_ o mafai ona maua o Ia.
2. O le Atua o lo tatou \_\_\_\_\_.
3. Ia \_\_\_\_\_ e lē ua amio leaga ona ala.
4. O le Atua, o le \_\_\_\_\_ lava Ia.
5. O le Atua e \_\_\_\_\_ a tatou agasala.

**PESE:** Saili e le faiaoga se pese e faaiu ai le mataupu.

**A’OA’OGA:**

1. Aveese le paie, augata aua o ala na o Satani.
2. E fiafia Iesu pe a tatou savavali i ona ala.
3. Faalatalata i le Alii i taimi uma.

.....

## **MANATU TAIALA O TESEMA: O IESU LE FAAOLA**

Ua tauluga mataupu o le 2019, i le fanau mai o Iesu lo tatou Faaola. E le gata o le masina o Tesema ua tatou faamanatuina ai le Soifua mai o Iesu le Mesia, ae faapea foi ona tatou manatua ai le tauluga o Lana galuega tala'i i le lalolagi, e pei ona Ia tuuina atoa atu ai lona Soifua mo le faaolaina o i tatou tagata agasala.

**ASO SA: 1 TESEMA 2019**

**MATAUPU: UA FANAU MAI IESU LE TUPU**

**SINI:** Ia malamalama le vasega, o Iesu ua fanau mai, e le gata o le Tupu, ae o Ia lava o le Faaola mo tagata uma.

**TUSI FAITAU:** Mataio 2: 1 – 6

### **FESOASOANI MO FAIAOGA:**

Tamaiti, o le tala i le fanau mai o Iesu lo tatou Alii Faaola, o se tala e faamanatu pea ma tupu pea lona taua tele i loto ma mafaufau, o ē ua faatuatua i le Alii o Iesu Keriso. E ui foi o se tala e falogo pea i ai i so o se tausaga, ae foliga fou lava i o tatou loto.

O le vaitau ao avea Herota le sili ma tupu o tagata Iutaia uma, o le taimi tonu lea na fanau mai ai Iesu i le aai o Peteleema i Iutaia. O lea po na omai ai makoi ma Sasae i Ierusalem, e saili tonu le nofoaga o fanau ai le Mesia. Na malaga lava i latou ma talatalanoa – “Po o fea o iai le ua fanau mai o le Tupu o tagata Iutaia...” Sa taitaiina i latou i lea po, e le malamalama o le

fetu. Sa latou naunau atu ma le faamalolosi, pe afai e maua le mea o fanau ai le pepe, ona latou ifo atu lea ia te Ia.

Na iloa e le tupu o Herota lea tala, i le tupu fou o tagata Iutaia ua fanau mai. O le pogai lea na popole ai ma atuavale lona loto, aemaise Ierusalem uma. O lona fememea'i, na ia faapotopoto ai i ositaulaga sili uma ma le au Tusiupu o le nuu. O lona manao, sei o latou ta'u mai ma faailoa atu ia te ia, po o fea o fanau ai le Keriso.

Na faailoa atu e ositaulaga sili ma le au tusiupu ia Herota, o Peteleema i Iutaia e pei ona faamauina e le au perofeta o le Feagaiga Tuai, pei o Mika 5: 2. “O oe foi Peteleema i le nuu o Iuta, e te le topito ona faatauvaa i alii o Iuta, aua e tupu mai ia te oe le faipule, o le na te pule i lo'u nuu o Isaraelu.”

### **Upu Faamalamalama:**

- i) Herota - o Herota le sili (Herod the great) sa fai ma tupu ia Iutaia uma.
- ii) makoi - o e popoto i fetu ma le vanimonimo
- iii) atuavale - lē mautonu, popole

### **GALUEGA FAATINO: Tali Fesili**

1. Sa fanau Iesu i Ierusalem i Iutaia, sa'o pe sese?  
Tali: Sese
2. O Herota sa fai ma tupu o Iutaia uma, sa'o pe sese?  
Tali: Sa'o
3. Aisea na o ai makoi e saili le mea o fanau ai Iesu?  
Tali: Sei o latou ifo atu ia te Ia.
4. O le a na taitaia le malaga a makoi?

Tali: O le fetu i Sasae

5. O le a le lagona na oo ia Herota ina ua faalogo i le tupu fou ua fanau mai?

Tali: Atuatuvaale, popole.

6. O tusi a ai na faamauina ai folafolaga i le tupu e fanau mai?

Tali: Tusi a perofeta (Isaia, Mika)

7. O Iesu, o Ia o le tupu ae o le faipule foi i le nuu o Isaraelu – sa’o pe sese?

Tali: Sa’o

**PESE:** Ua tatou i le vaitau agai atu i le Kerisimasi, ua tatau ona pepese tamaiti i pesega o le Kerisimasi.

#### **A’OA’OGA:**

1. O Iesu le Tupu Sili.
2. Ia fiafia e faamanatu le Kerisimasi.

.....

**ASO SA: 8 TESEMA 2019**

**MATAUPU: NA AFIO MAI IESU E FAAOLA LE LALOLAGI.**

**SINI:** Ia malamalama le vasega, na Afio mai le Alii e lavea’i le tagata agasala.

**TUSI FAITAU:** Ioane 3: 16 – 18

#### **FESOASOANI MO FAIAOGA:**

Tamaiti, ua tatou faamanatuina i lenei masina mulimuli o le tausaga, le fanau mai o Iesu lo tatou Alii. O Ia o lo tatou Faaola i o tatou tino, mafaufau, loto ma agaga. Ua faailoa mai e Ioane i le vaega o le tusi sa tatou faitauina, o le auina mai e le Atua o lona Atalii e to’atasi i le lalolagi, o le faatinoga o lona alofa. Ua Ia alofa mai ia i tatou o tagata agasala, nei fano ma faaumatia lo tatou ola e le agasala. O le finagalo maualuga lava i lo tatou Atua, ia tatou salamō ma liliu ese mai le leaga ma le agasala, ae ia faatuatua ia Iesu Keriso, e maua ai e le tagata le ola faavavau, le mafutaga tumau ma Ia i le lagi.

O le galuega faaola a Iesu na Ia faia i tagata mama’i; o ana a’oa’oga ma vavega e tele na vaavaai i ai tagata, o a’oa’o atu ai ma faatino e le Alii, sa iai lava tagata na latou lē taliaina. Peitai, na iu lava ina tuuina atoa mai lona ola, ina ia maliu mo le togiolaina o agasala a le lalolagi. E ui lava ina maliu Iesu, a e na Toetu manumalo mai lava o Ia i le tuugamau.

O le atoaga lena o le galuega faaola a le Atua mo i tatou tagata agasala, na afio mai ai Iesu. Ma o lo o tatou tiute ia fai, o lo tatou salamō lea, ma fatutua ua na o Iesu Keriso lo tatou Alii ma le Faaola. Tamaiti, e ese le maualuga o le alofa o le Atua ia i tatou. Pe tatou te agasala ma faagalo le Atua i le tele o aso o lo tatou ola, e taumulimuli pea ia i tatou le alofa o lo tatou Atua.

**GALUEGA FAATINO: Paso - Saili upu nei i le paso:-**

ATUA, ATALII, LALOLAGI, FANO, FAAVAVAU, FAAOLAINA, ALOFA, AUINA, TOATASI, FAATUATUA, FAAMASINO, FAASALAINA.

A	A	U	A	V	A	V	A	A	F
E	T	S	U	A	S	E	I	U	A
O	A	U	I	N	A	I	S	T	A
U	L	O	A	I	E	G	A	A	S
T	I	E	L	A	S	A	T	U	A
A	I	U	O	L	V	L	A	T	L
S	P	T	F	O	I	O	O	A	A
L	F	A	A	A	T	L	T	A	I
O	N	I	S	A	M	A	A	F	N
O	M	U	E	F	V	L	F	T	A

**PESE:** O le vaiatau o pesepesega o le Kerisimasi.

**A’OA’OGA:**

- Ia fai ma a’oa’oga i le fanau, lo latou taulotoina o le fuaiupu e 16 i le tusi na faitauina.

.....

**ASO SA:** 15 TESEMA 2019

**MATAUPU:** O LE TALA LELEI MO I TATOU UMA

**SINI:** Ia malamalama le vasega, o le Faaola ua fanau mai, o le Tala Lelei lea mo le lalolagi uma.

**TUSI FAITAU:** Luka 2: 8 – 14

**FESOASOANI MO FAIAOGA:**

O le po na fanau ai Iesu, sa faailoa mai lava e le Atua lona Alo pele i le lalolagi. I le tatou Tusi Faitau, ua faamauina ai le folafolaina atu o le fanau mai o Iesu i leoleo mamoe sa i le vao i lea po. O leoleo mamoe, o i latou ua latou tausia se lafu mamoe. Latou te fesoasoani atu i mamoe, taitai mamoe i le vao lelei ma vai, e aai ma feinu ai. E le gata i lena, ae puipui i mamoe nei aina e manu feai, ma saili foi i se mamoe e leiloa. Pe afai foi e moomia ni tamai mamoe mo faiga taulaga i le malumalu mo le faamagaloina o agasala, ua na o i latou lava ua iloa lelei tamai mamoe tatau mo nei taulaga.

Tamaiti, e manatu lava, o le pogai lea o le valaauina, o leoleo mamoe e agelu a le Alii, sei faamanuia ma faailoa le Tamai Mamoe a le Atua (Lamb of God – Ioane 1: 36), o Lē o le a na aveesea a agasala uma a le lalolagi. E ui lava la i le fefefe o leoleo mamoe ina ua latou vaaia le agelu a le Alii, ua pupula faataaliolio mai ia i latou, ae na mafanafana lava ina ua faailoa mai e le agelu, "...o le aso nei, ua fanau ai ia te outou i le aai o Tavita le Faaola, o ia o Keriso le Alii... O le Tala Lelei lea mo tagata uma, auā na afio mai mo le lalolagi uma. Poo ai lava le tagata ua faatauavaa ma faamaulalo lona loto e talia lava lona afio mai, o le tagata lena e faaolaina e Ia. Tamaiti, o lo tatou taliaina o Iesu, e le seiloga ua maua le faatagaga mo oe. E leai, ua na o le salamō lava ma talia Iesu i lou loto. O Ia o le Tala Lelei mo tagata uma, auā na maliu ma toetu, ina ia faaolaina tatou tagata agasala.

O le po na fanau ai Iesu i Peteleema i le fale o manu, na faatasi mai ai ma le agelu o ‘au mai le lagi e toatele e vivii atu i le Atua. *“O le viiga i le Atua i mea aupitoaluga, ma le manuia i le lalolagi i tagata ua alofagia e Ia.”*

## **GALUEGA FAATINO: Taliga Fesili**

Tali mai i fesili nei faatatau i le Mataupu

1, Ta'u mai ni tiute o le leoleo mamoe e tatau ona fai?

Tali: E puipui mamoe nei aina e manu feai, taitai i le vao lelei, faafeinu mamoe, saili se mamoe e sese ese.

2. O le a le vaaiga lea na fefefe ai leoleo mamoe i le po na fanau ai Iesu?

Tali: O le agelu a le Alii ua pupula faataaliolio mai ia i latou.

3. O ai e ana upu nei – “*Aua tou te matata'u aua faauta, ou te aumai ia te outou le Tala lelei....*”

Tali: O le agelu a le Atua.

4. O ai na vivii i viiga i le Atua i le po na fanau ai Iesu?

Tali: O le agelu ma au mai le lagi.

5 E faapefea ona tatou talia Iesu ua fanau mai?

Tali: Talia i le loto maulalo, salamō ma faatuatua ia te Ia.

**PESE:** Pese Kerisimasi (Alalaga ia)

### **A'OA'OGA:**

1. Ua na o Iesu lo tatou Faaola.

2. Ia viia le Alii i lona alofa

3. O se tala lelei amioga lelei tatou te fai.

.....

***IA MANUIA LE KERISIMASI & TAUSAGA FOU 2020***